

van joe; maar joe a sal wees vrolijk, en bli, want deese joe Broeder a wees dood, en ka kom leevendig weeraan, em a wees vertoorn, en ben gevonden.

§ 75.

Gliknis van die ongerechte Hoeshouer, en van die rik Man, en Lazarus.

Luce. 16: 1—31.

En Em a see ook na Si Jungers: Daar a wees een rik Man, welk a hab een Hoeshouer: en deese a word verklaagt by em, as een, die ka verwoest Si Goed. En die Heere a roep em, en a see na em: Hoeso die ben, dat mi hoor deese Dingen van joe? Gie Reekenskap van joe Hoeshouing: Want joe no kan wees verder Hoeshouer meer. Die Hoeshouer a see by em selv: Wat mi sal doe? mi Heere neem die Hoeshouerskap van mi; vor dig die mi no kan, en mi ben skaam vor beddel. Mi weet wel wat mi will doe, waneer mi word afgeset van die Amt, dat sender neem mi nabinne sender Hoesen. En em a roep allemaal Skuldenaars van si Heere na em, en a see na die eerste: Hoe veel joe ben skuldig na mi Heer? em a see bendert

Tonnen Olie. En em a see na dieselvede: Neem joe Handskrift set neer en skriev met Haast Vyftig. Dan em a see na die ander: En joe, hoe veel joe ben skuldig? em a see: Honderd Maat-Weit. En em a see na deese: Neem joe Handskrift, en skriev Tachtig. En die Heer a pries die ongerechte Hoeshouer, dat em a ka handel soo voorsichtig: Want die Kinders van deese Weild ben, in sender Manier meer wies, as die Kinders van die Licht. En mi see na jender: Maak na jender selv Vrienden, met die ongerechte Mammon, voor dat, wanneer jender leid Mankement, sender kan neem jender na die ewige Tabernakelen. Wie ben getrouw in die Mindeste, die ben getrouw in die groote ookal; en wie ben onrechtveerdig in die Mindeste, die ben onrechtveerdig ook in die Groote. As jender dan no ben getrouw na die ongerechte Mammon, wie will betrouw na jender die waarachtige Rikdom? En as jender no ben getrouw in die vrende Goed; wie sal gie na jender diejeen, wat ben jender eigen? Geen Hoeds-Dienaar kan dien twee Heeren: Want em sal haat die een, en hab die ander lief; of em sal hang na die een, en vernacht die ander; jender no kan dien God en die Mammon. En die Phariseen a hoor all deese Dingen ookal, sender a wees gierig

en a verspot Em. En Em a see na sender : Jender ben van die Volk, die rechtveerdig is selv navoor die Menschen, maar God ken jender Hert ; want wat ben hoog onder die Menschen, die ben een Grouwel in die Aangesicht van God. Die Wet en die Propheeten ben tee na Johannes : en van die Tid af die Koningrik van God word gepredikt door die Evangelium, en elkeen dring nabinne die met Geweld. Maar die ben meer lecht, dat die Hemel en die Aarde vergaan, as dat een Tittel van die Wet sal vall wee. Wie verhat si Wif, en trouw een, ander, die breek die Echte ; en wie trouw soo een verlaten Wif, die breek die Echte ookal.

En daar a wees een rik Man, die a wees gekleed met Purper en kostlik Linnen, en a leev alle Dagen heerlik, en na Vrolikheid. Maar ook een pover Beddelaar a wees daar ookal, met Naam Lazarus, die a lee navoor die rik Man si Deur, voll van Sweeingen, en a beger, vor word versadigt van die Krumeljes, die a vall af van die rik Man si Tafel. Maar ook die Hond sender a kom, en a lek si Sweeingen.

En die a geskied dat die pover. Beddelaar a dood, en a word gedraagen van die Engels na die Skoot van Abraham. En die rik Man a dood ookal, en a word begrafen.

Toen em a wees noe nabinne die Hell, en in die Pien, em a lecht op si Ogen, en a kik Abraham van ver af, en Lazarus in si Skoot, a roep en a see : Vader Abraham, neem Ja mer over mi, en stier Lazarus, dat em dup die utterste van si Vinger nabinne die Water, en verkoel mi Tong, want mi leid Pien nabinne deese Vlam. Maar Abraham a see : Dink op, Soon, dat joe ka ontvang joe Goets in joe Leevid, glik as Lazarus daartegen ka ontvang Quaat ; en noe em word vertroost, en joe word gepienigt. En boven deese alle maal ben tuschen ons en jender, een groot Kloft bevestigd, soo dat sender, die will vaar neer van hiesoo na jender, no sal kan, en ook niet van da sender sal kan vaar over na ons. Da om a see, soo mi bed joe, Vader, dat joe stier em nabinne die Hoes van mi Vader ; want mi hab nochal Yf Broeders, dat em doch getug na sender, voor dat sender no kom ookal na deese Plaats van Pieniging, Abraham a see na em : Sender hab Moses en die Propheeten ; lat sender hoor dieselvde. Maar em a see : Neen, Vader Abraham, maar as cen van die Doojen sal kom na sender, soo sender sal bekeer sender. Abraham a see na em : As sender no hoor Moses en die Propheeten, soo sender ook no sal gloof, maski een van die Doojen sal staan op.

Jesus Vermaan Si Jüngers.

Luc. 17 : 1—10.

En Em a see na Si Jüngers : Die ben onmooglik, dat niet Ergermissen sal kom ; maar ongelukig em ben, door welk sender kom ! Die sal wees beeter voor em, dat een Molenssteen a word gehangen na si Neck, en a word gegooyt nabinne die See, as dat em a sal erger een van deese Klöntje. Bewaar jender van die. As joe Broeder sondig na joe, soo bestraf em, en as em bekeer, soo vergie em. En as em sal sondig tegen joe sevenmaal in een Dag ; en sal kom sevenmaal in een Dag Weeraan na joe, en see ; die be-rouw mi ; soo joe sal vergie em.

En die Apostels a see na die Heere : Verstark ons die Gloop. Maar die Heere a see : As jender hab Gloop, as een Mostert-Saad, en see na deese Moerbeejer-Boom : trek joe ut die Wolter, en verplant joe nabinne die See, soo die sal wees gehoorsam na jender.

Welk ben onder jender die hab een Dienst-Knecht, die ploeg voor em, of passop die Vee, die sal see na em, wanneer em kom van

die Veld na Hoës : Loop hen aanstonds, en set joe na Tafel ! ben die dan niet soo dat em sal see na dieselvde : Maak klaar dat mi jeet voor Avend, gort joe selv op, en dien mi, tee mi ka jeet en drink ; asteraan joe sal jeet en drink ookal ! Em sal see dan ook dank na dieselvde Dienst-Knecht, dat em a ka doe, wat a wees commandeert na em ! Mi dink, wat a wees commandeert na em. Soo jender ookal wanneer jender ka doe alle Dingen welk ben commandeert na jender, dan see : Ons ben onprofitabel Dienst-Knechten, ons ka doe (maar,) wat ons a wees skuldig vor doe.

Wonderberke na tien Lazarus Sicken. Antwoord op die Vraag, wanneer die Koning-rik van God sal kom ?

Luc. 17 : 11—37.

En die a geskied, toen Em a reis na Jerusalem, Em a passeer door die Middel van Samaria en Galilea. En toen Em a kom nabinne en Dorp, da tien Mans met Lazarus-Sichte a gemoot Em, sender a staan van ver, en a lecht op sender Stem, en a see : Jesus, liefe Meester, neem Jamer over ons ! En

toen Em a kik sender, Em a see na sender: Loop hen, en wies jender selv na die Prieesters. En die a geskied, toen sender a loop hen, dat sender a kom skoon. Maar een van sender, toen em a kik, dat em a ka kom gesond, a keer om weeraan, en a pries God, met een helder Stem; en a vall op si Angesicht, navoor Jesus si Voeten, en a dank Em: en die a wees een Samaritan. Jesus a antwoord, en a see: Die no a wees dan tier, welk ka kom gereinig, waar beh dan die Negen? Niet een a wees meer vor vind die keer om weeraan vor gje ha God die Eere, as deese Vremdeling? En Jesus a see na em: Staan op, loop hen, joe Gloof ka help joe. En toen die Phariseen a vraag Em: Wanneer die Koningrik van God sal kom? soo Em a antwoord na sender, en a see: Die Koningrik van God no kom met een groot Aansien van butten, Volk no sal see ook: Kik, hier of daar die ben. Want kik, die Koningrik van God ben al na Middel onder jender.

En Em a see na die Jungers: Die Tid sal kom, dat jender sal begeer vor kik een Dag van die Mensch si-Soon, en jender no sal kik die. En sender sal see na jender: Kik, hier Em ben, of daar Em ben. Maar no loop hen; en no volg sender ookal. Want

glik as die Blixem, wanneer die vaar ut, skien van die een End na onder die Hemel, tee na die ander End van die Hemel, soo die sal wees met die Mensch-Si-Soon ookal, na Si Dag, Maar toevorn Em moet leid moeschi, en moet word vergooyt van deese Geslacht.

En glik as die a geskied na die Tid van Noah, soo die sal geskied ookal, na die Dagen van die Mensch Si Soon. Sender a jeet, sender a drink, sender a trouw met Wif, sender a lat trouw sender: tee na die Dag, na welk Noah a loop nabinne die Ark, en die Sond-Vloeta kom, en a bederv sender allemaal. Glik soo ookal, as die a geskied na die Tid van Lot: Sender a jeet, sender a drink, sender a koop, sender a verkoop, sender a plant, en sender a bouw. Maar na die Dag, toen Lot a loop ut van Sodom, die a regen Vuur en Swavel van die Hemel, en a bederv sender allemaal: Even soo die sal wees ook na die Dag, wanneer die Mensch Si Soon sal kom openbaar. Na dieselvde Dag em, die ben op die Dak, on hab si Hoeraat nabinne die Hoers, no kom neer, vor haal dieselvde. Glik soo ookal, wie ben op die Veld, die no draai weeraan na die, wat ben aster em. Dink op na die Wif van Lot. Wie soek, vor behou si Leev, em sal verloor die, en wie soek vor verloor si Leev, em sal behou die. Mi see na jender:

In dieselvde Nacht twee sal lee op een Bedde, een sal word aangenomen, en die ander sal word verlaten. Twee Vrouwen sal mola met malkander; een sal word aangenomen, en die ander sal word verlaten. Twee sal wees op die Veld; die een sal word aangenomen, en die ander sal word verlaten. En sender a antwoord en a see na Em: Heere, waar? (: die sal geskied ;) En Em a see na sender: Na waar die Lichaaem ben, daar die Arenden sal word vergaadt.

§ 78.

Gliknis van die ongerechte Rechter. Van die Pharisee en Tollenaar.

Luc. 18, 1-14.

En Jesus a see na sender een Gliknis van die, dat Volk sal bed altyd, en no kom trang; en a see. Daar a wees een Rechter nabinnus een Stadt, die no a vrees God, en a keer ook voor niet een Mensch. Maar een Weduwe a wees in dieselvde Stadt ookal, die a kom na em, en a see: Maak mi vrie van mi Tegen Partie. En em no a will voor een lang Tid. Maar asteraan em a dink by em selv: Maski mi no vrees voor God; en mi no keer

ook voor een Mensch; doch, derwil deese Weduwe mank soo veel Moeite na mi, soo mi sal doe em si Recht, voor dat em no kom op die laatst, en maak mi geheel moeh. En die Heere a see: Hoor, wat die ongerechte Rechter see. God no sal doe dan Recht na si Uter kiesien sender ookal, die roep na em Dag en Nacht: maski Em ben-lang moedig over sender! Mi see na jender, dat Em sal doe Recht na sender in kort Tid. Doch wanneer die Mensch si Soon sal kom, joe dink dan, dat Em sal vind ook Gloof op die Aarde!

Maar Em a see na som, die a betrouw na sender selv, dat sender a wees rechtveerdig, en a vernicht die ander, deese Gliknis: Twee Menschen a loop naboven in die Temple, vor bed; die een a wees een Pharisee, en die ander een Tollenaar. Die Pharisee a staan, en a bed by em selv soo: Mi dank Joe God, dat mi no ben glik ander Volk, Roovers, Onrecht veerdigen, Echtebreekers, of ook, glik as deese Tollenaar; mi vast tweemaal in die Week, en mi gie die Tiende van allemaal, wat mi hab. En die Tollenaar a staan van veraf, en no a will lecht op ook si Oogen na die Hemel; maar em a slaa na si Borst, en a see: God wees gnadig na mi, die Sondar! Mi see na jender: *Deese* a loop gerechtveerdigt na si Hoes, meer as die ander. Want, wie verhoog

em selv, die sal word vernedert, en wie ver-
needer em selv, die sal word verhoogt.

§ 79.

*Antwoord op die Vraag, van wegens die
Skeping tussen die Echte-Volk.*

Math. 19, 1—12. Mark. 10, 1—12.

En die a geskied, toen Jesus a ka vollendig,
deese Woorden, Em a vertrek van Galilea, en
a kom na die Land-Deelen van Judea, na die
ander Sie van die Jordan. En een groot Hoop
Volk a volg Em, en a kom weeraan na Em.
En soo assi Gewente a wees, Em a leer sender
weeraan, en a genees sender daar. Da die
Phariseen a kom na Em, a versoek Em, en a
see na Em : Die ben dan recht, dat een Man
verlaat si Wif, om die Will van elkeen Or-
sak ? Em a antwoord na sender : Jender ka
lees dan niet, dat Em, die ka maak die Mensch
van Begin, die a maak, dat een Man en Wif
a sal wees ? en Em a see : Voordarom een
Mensch sal verlaat si Vader en Moeder, en sal
hang na si Wif ; en sender twee sal wees *een*
Vlesch. Wat God noe ka voeg malkander, die
een Mensch no sal parite. Da sender a see na
Em : Voorwaarom Moses ka gebied dan, vor-
gie een Skeyd-Brief, en vor verlaat em ? Em
a see na sender : Moses ka permitteer na jen-

der, vor gie een Skeyd-Brief, en vor verlaat
jender Wifs, om die will van die Hardheid van
jender, Hert ; maar van Begin af, die no ka
wees soo. En na Hoes Si Jungers a vraag
Em weeraan over dieselvd Saake. En Em
a see na sender : Wie verlaat si Wif, (sonder
dat die ben em die Will van Hoererie) en
trouw een ander, em breek die Echte ; en wie
trouw die Wif, die ben verlaten van si Man,
die breek die Echte ookal. Da die Jungers a
see na Em : As die Saake van een Man met
si Wif staan soo ; dan die no ben groot vor
trouw. Maar Em a see na sender : Niet el-
keen kan vat deese woord ; maar sender, na
welk die ben gegeven. Want som ben gesne-
den, sender ben van Moeder-Lif *soo* geboor-
den ; en som ben gesneden van die Mens-
chen ; en die hab som, die ka nie sender
selv, om die Will van die Koningrik van die
Hemel. Wie kan vat die, em vat die.

§ 80.

Jesus seggen die Kinders.

Math. 19, 13—15. Marc. 10, 13—16. Luc. 18, 15—17.

Dan sender a bring jonge Kindjes na Em,
dat Em a sal lee Si Handen op sender, en bed
over sender : maar die Jungers a bestraf deese
19*

die a draag sender. Maar toen Jesus a kik die, soo Em a kom ontvoerden, en a see na sender: Lat die Kindjes kom na mi, en no verbied die na sender. Want voor sender ten die Koningrik van God. Voorwaar mi see na jender; Wie no ontvang die Koningrik van God as een Kindje, die no sal kom nabinne, En Em a omvat sender met Si Arm en a lee die Handen op sender, en a segen sender.

§ 81.

Antwoord op die Vraag, van een rike Overte onder die Joden, en van Petrus.

Matth. 19, 16—30. Cap. 20, 1—16. Marc. 10, 17—31. Luc. 18, 18—30.

En toen Em a ka kom nabuten, na die Pad, da een Overste van die Joden, die a wees een jonge Man nochal, a loop na Em toe, a knie navoor Em, en a vraag Em: Goeje Meester, wat voor goeje Dingen mi moet doe, dat mi beerf die ewig Leev? En Jesus a see na em: Voor wat joe roep mi goet? Niemand ben goet, as die eenige God. Maar as joe will loop nabinne die ewig Leev, soo hou die Geboden. Em a see na Jesus: Welke? Jesus a see: Joe weet die geboden wel: Joe no sal doe Moord. Joe no sal breek die Echte. Joe no sal steel. Joe no sal gie valsch Getuignis.

Joe no sal doe Skade na jemand. Eer joe Vader en joe Moeder; en joe sal hab joe Naaste lief, soo as joe selv. Em a antwoord en a see na Jesus: Meester all deese Dingen mi ka hou van mi Jongheid af; wat mi manker dan nochal? En Jesus a kik na em met Liefde, en a see na em: Een Ding joe mankeer nochal, as joe will wees vollkom, soo loop hen, en verkoop allegaar, wat joe hab, en gie die na die Pover sender, soo joe sal hab een Skat nabinne die Hemel; en kom en volg mi, en neem die Kroes op joe. Maar em a kom swaarmoe-dig over deese Woorden, en a loop bedroefd wee van Jesus, want em a wees rik, en a hab moeschi Goed. Toen Jesus a kik, dat em a ka kom bedroefd, soo em a kik rondom na Si Jungers, en a see na sender: Voorwaar, mi see na jender: Een rik Man sal kom swaarmik nabinne die Koningrik van die Hemel. Maar die Jungers a verskrik goe over Si Woorden. En Jesus a antwoord weeraan, en a see na sender: Liefe Kinders, hoe swaar die ben, dat sender die set sender Betrouw na die Rikdom, sal kom nabinne die Koningrik van God; die ben meer lecht, dat een Kamel loop door die Oogo van een Naald, as dat een rik man kom nabinne die Koningrik van God. Maar sender a verskrik noch veel meer, en a see onder malkander: Wie kan kom dan sa-

lig ! Maar Jesus a kik na sender, en a see na sender. By die Menschen, die ben onmoglik, maar niet by God ; want alle Dingen ben mooglik by God.

Dan Petrus a see na Em : Kik, ons ka verlaat alles, en ka volg Joe, wat ons sal hab voor die ! Jesus a antwoord na sender : Voorwaar mi see na jender, dat jender, die ka volg mi, in die Wedergeboort, wanneer alle Dingen kom nieuwe, daar die Mensch Si Soon, sal set op die Troon van Si Heerlikheid, jender sal set ookal op twalf Troonen, en oordeel die twalf Geslachten van Israel. Daar ben niemand, as em verlaat Hoes, of Broeder, of Sisters, of Vader, of Moeder, of Wif, of Kinders, of Land, om die Will van mi, om die Will van die Evangelium, en om die Will van die Koningrik van God, die no sal ontvang hondert-voudig, noe al na die tegenwoordige Tid, Hoes, en Broeders, en Sisters, en Moeders, en Kinders, en Land, met vervolgingen, en in die toekomstige Werld die ewig Leev. Maar veel, welk ben die Eersten, sal wees die Laatste, en veel welk ben die Laatste, sal wees die Eersten.

Want die Koningrik van die Hemel ben glik een Hoes-Vader, die a loop ut na vroe vroe, vor huer Arbeiders na si Wienberg. En toen em ka accordeer met die Arbeiders, voor een

Penning tot Dag-Loon, em a stier sender na si Wienberg. En em a loop ut die derde Uur, * en a kik ander die staan leeg na die Market-Plats, en a see na sender : Jender loop hen na die Wienberg ookal ; mi will gie na jender, wat ben recht. En sender a loop hen. Weer-
 aan em a loop ut omtrent die sesde en negende Uur, † en a doe dieselvde. Maar tegen die elfde Uur ‡ em a loop ut, en a vind ander, die a staan leeg daar, en a see na sender : Voor wat jender staan hier die geheele Dag, sonder Werk ! Sender a see na em : Niemand ka huer ons. Em a see na sender : Jender ookal loop hen na die Wienberg, en wat sal wees recht, die jender sal ontvang. Toen noe die Averd a kom, da die Heere van die Wienberg a see na si Rentmeester ! Roep die Arbeiders, en gie na sender die Loon ; en begin van die laatste tee na die eerste. Da sender a kom die a wees gehuert in die elfde Uur, en elkeen a ontvang si Penning. Maar toen die Eersten a kom, soo sender a dink, dat sender a sal ontvang meer, en sender a ontvang ookal elkeen si Penning. En toen sender a ontvang die, soo sender a murmureer tegen die Hoes-Vader, en a see : Deese laatste ka werk

* Negen Uur Voormiddag.

† Tegen twalf en drie Uur.

‡ Tegen vyf Uur Aftersmiddag.

maar een Ur, en joe ka maak sender glik met ons, welk ka draag die Beswarde en die Heet van die Dag. Maar em a antwoord en a see na Een van sender. Mi Vriend, mi no doe onrecht na joe. Joe ka accordeer dan niet met mi voor een Penning ? Neem wat van joe ben, en loop hen. Maar mi will gie na deese laatste glik as na joe. Of mi hab dan niet Macht vor doe, wat mi will, met mi Eigen ? Joe Oogo ben dan boos, voordarom, dat mi ben soo goet ? So die Laatste sal wees die Eerste, en die Eerste die Laatste. Want veel ben ge-roepen, maar weenig ben utverkiesen.

§ 82.

Die Opwekking van Lazarus.

Joh. 11, 1-57.

En daar a wees een Man, die a lee siek, genaamt Lazarus, van Bethania, in die Dorp van Maria, en si Susster Martha. (: Maar Maria a wees deese, die * ka salv die Heere met Salv-Olie, en ka droog Si Voeten met si Haar, diesselvde si Broeder, Lazarus a lee siek :) Da si Sussters a stier na Jesus, en a lat

* Kort Tid asteraan.

see na Em : Heere, kirk, da em, die joe hab lief, die lee siek. Toen Jesus a hoor die, Em a see : Deese Siette no ben na die Dood, maar tot die Eer van God, dat die Soon van God word vertheerlikt door die. Maar Jesus a hab Martha lief, en si Susster, en Lazarus. Toen Em a hoor noe, dat die Lazarus a wees siek, soo Em a blier twee Dagen na die Plaats, waar Em a wees. Asteraan Em a see na Si Jungers : Lat ons loop weeraan na Juda. Si Jungers a see na Em : Meester, die laatste maal die Joden a will steening Joe, en Joe will loop na daar weeraan ? Jesus a antwoord : Ben dan niet twalf Stonden na die Dag ? Wie wandel na Dag, die no rivu eun want em kik die licht van deese Werld. Maar wie wandel na die Nacht, die stoot si selv ; want die no hab Licht, nabinne em. Deese Dingen Em a see, en dan Em a see na sender : Lazarus ons Vriend slaap ; maar mi loop hen, vor wek em op. Da Si Jungers a see : Heere, as em slaap, soo die sal kom beeter met em. Maar Jesus a spreek van si Dood : en sender a dink, dat Em a spreek van die Rust in die Slaap. Da Jesus a see die vrie ut na sender : Lazarus ka dood. En mi ben bli om die Will van jender, dat mi no ka wees daar, voor dat jender gloof ; maar lat ons loop na em. Dan Thomas die ben genaamt Twill-

ing; a see na die ander Jungers : Lat ons loop met ; dat ons dood met em. Da Jesus a kom en a vind em, dat em a ka lee all vier Dagen nabinne die Graf. (Maar Bethania a wees desty Jertsalem, omtrent vyftien veldweygs af) en veel van die Joden a ka kom na Martha en Maria, vor vertroost sender over sender Broeder. Toen nbe Martha a hoor, dat Jesus a kom, soo em a loop, vor gemoet Jesus ; maar Maria a set still na Hoes. Dan Martha a see na Jesus : Heere, as joe a sal ka wees hier, mi Broeder no a sal ka dood. Maar mi weet ook nochal, dat even wat Joe bed van God, die God sal gie na Joe. Jesus a see na Em : Joe Broeder sal staan op. Martha a see na Em : mi weet well, dat em sal staan op, na die Opstanding na die laatste Dag. Jesus a see na em : *Mi* ben die Opstanding en die Leev ; wie gloof na *Mi*, die sal leev, maski em a dood. En wie leev, en gloof na mi, die no sal dood, nooit niet. Joe gloof dan deese ? Martha a see na Em : Heere, ja, mi gloof, dat Joe ben Christus, die Soon van God, die ka kom in die Werld. En toen em a ka see die, em a loop hen, en a roep si Suster Maria heimlik, en a see : Die Meester ka kom, en Em roep voor joe. Toen Maria a hoor die, soo em a staan op met Haast, en a kom na Jesus. (Want Jesus no a ka kom

nabinne die Dorp nochal, maar Em a wees noch na die Plaats, waar Martha a kom vor gemoet Em. Die Joden, die a wees by Maria nabinne die Hoes, en a vertroost em, toen sender a kik dat em a staan op met soo een Haast, en a loop nabuiten, sender a volg em, en a see : Em loop na die Graf, vor traan daar. Toen noe Maria a kom, waar Jesus a wees, en a kik Em, soo em a vall neer na Si Voeten en a see na Em : Heere, as Joe a sal ka wees hier, mi Broeder no a sal ka dood. En toen Jesus a kik em a traan, en die Joden, a traan ookal, welk a kom met em : soo Si Hert a kom goe beweegt, Em a sucht in die Geest, en a bedroef Em selv en a see : Waar jender ka lee em ? Sender a see na Em : Heere, kom en kik die. En Jesus a traan. Dan die Joden a see : Kik, hoe lief *Em* a ka hab em. Maar som van sender a see : Die Man, die ka open die Oogen van die Blinden a kan maak dan niet, dat ook *deese* no a sal dood ? En Jesus a kom weeraan goe beweegt nabinne Em selv, en a kom na die Graf : maar die a wees een Hool, en een Steen a lee op die. Jesus a see : Neem die Steen wee. Martha die Suster van em, die a wees dood, a see na Em : Heere, em stink noe al : Want em ka lee al vier Dagen. Jesus a see na em : *Mi* ka see dan niet na joe, as

joe a kan gloof, soo joe a sal kik die Heerlikheid van God? Dan sender a neem die Steen af, waar die Dooje a lee. En Jesus a lecht op Si Oogen, en a see: Vader! mi dank Jye, dat Joe ka verhoor mi; doch *Mi* weet, dat Joe verhoor mi altid, maar om die Will van die Volk, die staan hier-rondom, misee die, dat sender kan gloof, dat *Joe* ka stier mi. Toen Em a ka see die, da Em a roep met een groot Stem: Lazarus, kom ut! En die Dooje a kom ut, gebonden met Graf-Doeken na Voeten en Handen, en si Aangesicht a wees gebonden met een Sweet-Dock. Jesus a see na sender: Loss em, en lat ein wandel.

Veel noe van die Joden, die a ka kom na Maria, en a kik, wat Jesus a doe, a gloof na Em. Maar som van sender a loop hen na die Phatiseen, en a see na sender, wat Jesus a ka doe. Dan die Hoog-priesters en die Phatiseen a vergader een Raad, en a see: Wat ons sal doe! Deese Mensch doe moesch Teekens. As ons lat Em doe soo, dan sender allemaal sal gloof na Em. Dan die Romeynen sal kom, en neem wee ons Land en ons Volk. En een van sender, Caiphas, welk a wees Hoog-priester dieselvde Jaar, a see na sender: Jender weet nietmetal, bedink ook niet wat ben profitabel voor ons; die ben beeter voor ons, dat *Een* Mensch dood voor

die Volk, as dat die geheele Volk sal bederv: En deese Woorden em no a spreek van si selv: maar derwil em a wees Hooge-Priester dieselvde Jaar, sov em a prophecey. Want Jesus a sal dood voor die Volk: en niet voor die Volk alleen; maar dat Em a sal breng ook die Kinders van God malkander, welk a wees verstroit. Van die Dag af sender a maak die ut na sender Rand, hoeso sender a sal kan maak Em dood. Voordarom Jesus no a wandel meer soo openbaar onder die Joden; maar Em a loop van daar na een Land, deest by die Weestyne, nabinne een Stadt, genaamt Ephrem, en daar Em a hou Em op met Si Jungers. En die Passa-Feest van die Joden a wees desby, en moeschi Volk ut van dieselvde Land a loop naboven na Jerusalem, bevoor die Passa-Feest, vor reinig sender. Dan sender a staan en a vraag voor Jesus, en a praat met malkander nabinne die Temple: Wat jender dink dat Em no will kom na die Feest? Maar die Hoog-priesters en die Phatiseen a ka gie een Gebod ut: as eenigste Mensch a sal weet, waar Jesus ben, dat em a sal mank die bekend; voor dat sender a kan vass Em.

*Jesus maak bekend die derde maal Si Leiden,
Dood en Opstanding. Die Bed van die
twee Soons van Zebedens.*

Matth. 20: 17—28. Mari. 10: 32—46. Luc. 18: 31—34.

Asteraan Jesus a loop met Si Jungers naboven, na Jerusalem, en Em a loop navoort sender. Maar sender a wees na Skrik a volg Em, en a vrees sender. Want Em a neem die Twalf weeraan apart na Em, en a see na sender, wat a sal kom over Em. Kik, [Em a see:] ons loop naboven, na Jerusalem, en all die Dingen sal word vollend, die ben geskreven door die Propheeten, van die Mensch Si Soon. Want em sal word overgeleveert na die Hoog-priesters en Skrifgeleerden, en sender sal veroordeel Em na die Dood, en sal overleveer Em na die Heidens; en Em sal word bespot en geskimpeert en bespugt, en sender sal geesel Em, kroesig Em, en maak Em dood, en na die derde Dag Em sal staan op weeraan. Maar sender a verstaan niet een van deese Dingen, en die Woord a wees verborgen na sender, en sender no a weet, wat Em a will see met die.

Dan die Moeder van die Kinders van Zebedus a kom na Em, met si twee Soons, Jacobus en Johannes, en sender a vall neer navoort Em, a begeer een Ding van Em, en a see na Em: Meester ons a will gern, dat Joe sal doe na ons, wat ons sal bed van Joe. Em a see na sender. Wat jender will dan, dat mi sal doe na jender? En sender a see na Em: Gie na ons, dat ons kan set een na Joe rechtheid, en een na Joe slinker Hand, in Joe Heerlikheid. En die Moeder a bed Em ookal: Lat deese mi twee Soons set in Joe Koningrik, een na Joe rechter, en die ander na Joe slinker Hand. Maar Jesus a see na sender: Jender no weet, wat jender bed. Jender kan drink dan die Drink-Beeker, die *Mi* sal drink, en kan lat doop jender met die Doop, met die *Mi* word gedoopt? Sender a see: Oia, die ons kan. En Em a see na sender. Jender sal drink wel die Drink-Beeker, die *Mi* sal drink, en word gedoopt ookal met die Doop, met die *Mi* word gedoopt; maar vor set na *Mi* rechter en na mi slinker Hand, die no staan by mi, vor gie na jender, maar die sal word gegeven na sender, voor welk die ben bereid van mi Vader. T'oen die Tien a hoor die, soo sender a kom ontoevreden over die twee Broeders, Jacobus en Johannes. Maar Jesus a roep sender na Em, en a see: Jender weet,

dat die Vorsten in die Werld hab vor regteer, en die Machtigen onder sender gebruk Geweld. Maar soo die no sal wees onder jender, want wie onder jender will wees groet, die sal wees jender Dienaar. En wie onder jender will wees die Eerste; die sal wees Dienst-Knecht van allemaal die ander. Want ook die Mensch Si Soon no ka kom, vor mi dien Em; maar dat Em dien, en gie Si Leev tot Lossgeld voor moesehi.

§ 84.

Jesus Koth nabinne die Hoes van Zacheus.

Luc. 19: 1-27.

Dan sender a kom na Jerticho, En toen Jesus a passeer door die Stadt, kik, een Man a wees daar, met Nuhm Zacheus; die a wees een Overste van die Tollenaars, en een rik Man. Deese a begeer, vor kik Jesus, wie Em a wees, en no a kan, van wegens die Volk; want em a wees kleen van Person. En em a kom bevoor, en a klin naboven een Moerbejer-Boom, vor kik Jesus; want daar Em a sal passeer. En toen Jesus a koth na die-selvd Platst; Em a kik opwards, en a kik die Zacheus, en a see ha ein: Zacheus, mak Haasi en kom neer, want mi moet blyv van

Dag nabinne joe Hoes. En em a kom neer met Haast, en a neem Em op met Biskap. Toen sender a kik die, soo sender allemaal a minnatreer, dat Em a neem Herberg by een Sondaar.

En Zacheus a staan daar, en a see na die Heere. Kik, Heere, die Half van mi Goed mi gie na die Pover sender, en as mi ka bedrug eenigste Mensch, soo mi gie die na em viervondig weeraan. En Jesus a see na em: Van Dag Saligheid ka kom na deese Hoes, dertwil em ben ook een Soon van Abraham. Want die Mensch si Soon ka kom, vor seek en vor maak salig, wat a wees verlooren.

Toen sender a hoor noe deese Dingen, soo En a see verder een Gliknis. Voordarom, dat Em a wees destby Jerusalem, en sender a dink, dat die Koningrik van God a sal kom noe openbaar, aanstonds; soo Em a see dan: Een edele Heer a reis na een ver Land, vor neem in een Koningrik, en vor koth dan weertan. En em a roep tien van si Dienst-Knechten, en a leveer na sender tien Pond, en a see na sender: Handel met die, tee mi kom weertan. Maar si Borgers a haat em, en a stier Bodskap aster em, en a lat see na em: Ons no will, dat deese sal regeer over ons. En die a geskied toen em a kom weertan, aster em a ka ontvang die Koningrik; em a gie Order,

vor roep dieselvde Dienst-Knechten, na welk em a ka leveer die Geld, dat em a kan weet, hoe veel elkeen a ka profiteer met si Handel-skap. Dan die eerste a kom, en a see: Heere, joe Pond ka profiteer tien Pond. En die Heere a see na em: Well joe goeje Dienst-Knecht, derwil joe ka wees getrouw in die Mindeste, soo joe sal hab Macht over tien Steden. Die tweede a kom ookal, en a see: Heere, joe Pond ka win vyf Pond. Na deese em a see glik soo: En joe sal wees over vyf Steden. En die derde a kom en a see: Heere, kik, hier ben joe Pond, die mi ka behou nabinne mi Sweet-Doek. Mi a wees bang voor joe: want joe ben een hard Man, joe neem wee, wat joe no ka lee, en maay, waar joe no ka saay. Die Heere a see na em: Ut van joe eigen Mond mi oordeel joe, o joe quaeje Dienst-Knecht, as joe a weet, dat mi ben een hard Man, en neem wee, wat mi no ka lee, en maay, waar mi no ka saay; Voorwaarom joe ka gie dan niet mi Geld na die Wesselbank? en wanneer *Mi* a ka kom weeraan, soo mi a kan neem die met Profit. En Em a see na sender, die a staan daar: Neem die Pond wee van em, en gie die na diejeen die hab tien Pond. En sender a see na em: Heere, em hab doch tien Pond. Maar mi see na jender: Wie hab, die sal ont-

vang meer, en wie no hab, van em sal word genomen ookal, wat em hab. Maar sender, die ben mi Vyanden, en no a will, dat mi a sal tegeer over sender, breng hie-soo, en sla sender dood hier navoor mi.

§ 85.

Wonderwerk na twee Blinden.

Mat. 20: 29—34. Marc. 10: 46—52. Luc. 18: 36—43.

En toen Em a kom ut met Si Jungers van Jericho, da moesehi Volk a volg Em. En kik, twee Blinden a set na die Pad, en a beddel. Een van sender si Naam a wees Bartimeus, die Soon van Timens. En toen sender a hoor dat soo moeschi Volk a passeer daar; soo sender vraag, wat die a wees? En sender a krieg vor weet, dat Jesus van Nazareth passeer voorby. Da sender a roep en a see: Jesus, joe Soon van David, neem Jamer over ons! En die Volk, die a loop bevoor, a bestraf sender, dat sender a sal swieg still. Maar sender a roep veelmeer en a see: O Heere, joe Soon van David, neem Jamer over ons! En Jesus a staan still, en a see: Roep sender. Da sender a roep die Blinden, en a see na sender: Wees getroost, staan op,

Em roep jender. En sender a gooy die Kleern wee van sender, en a Korn na Jesus. En Jesus a see na sender: Wat jender will, dat mi sal doe na jender! Sender a see na Em: Heere, datons Oogen sal word geopeft: En die a jamer Jesus, en Em a roer sender Oogen aan, en a see na sender Loop hen, jender Ghoofka help jender. En aanstonds sender Oogen a kan kik, en sender a volg Em en a verheerlik God. En allemaal Volk, toen sender a kik die, a loof God.

MARTEL WEEK.

§ 86.

Die Gesticdnis van die Saterdag na die

Avend aster die Sabbath.

Matt. 26: 6-13. Marc. 14: 3-9. Joh. 12: 1-9.

Ses Dagen bevoor die Passa-Feest Jesus a kom na Bethanien, waar Lazarus a wees, die a ka wees dood, en die Jesus a ka wok op van die Doojen. Daar sender a maak een Avend-malid bereid voor Em, na die Hoes van Simon die Lazares-Sieke, en Martha a dien Em; en Lazarus a wees een van sender, die a set na Tafel met Em. Da Maria a kom na Em, die hab een Glas met een Pond van die onvervalscht en kostlick Nardus-Olie, en em a salv die Voeten van Jesus, en a droog sender met si Haar. En asteraan em a breek die Glas, en a gooy die ander Part op Jesus si Hooft, toen Em a set na Tafel, en die Hoes a kom voll met die Renk van die Salv-Olie. Dan een van si Jungers Judas Iscarioth, Simon si Soon, die a verraad Em asteraan, a see: Voorwaaron deese Salv-Olie no a word verkoopt voor driehondert Penningen, en gegeven na die Pover sender! Doch em no a see die dat em a keer voor die pover Volk, maar

em a wees een Dief en a hab die Beersch, en a drang wat a word gegeven. En daar a wees som van die ander Jungers sender ookal a kom ontoevreeden a marmureer nabinne sender selv, en a see : Voor wat deese Verlessal dien ? Want deese Water a sal kan word verkoopt voor veel Geld, en gegeven na die Pover sender. Toen Jesus a bemerk die, soo Em a see na sender, Lat em met Vrede : voor wat jender trubel em ? Em ka doe een goeje Werk na mi. Jender hab altid pover Volk by jender, en as jender will, jender kan doe Goets na sender : maar *Mi* jender no hab altid. Em ka doe wat em a kan, en dat em bewar deese Salv-Olie, en a gooy die op mi Lichaam, die em ka doe vor Salv mi voorut tot mi Begrafnis. Voorwaar, mi see na jender : Waar deese Evangelium sal word gepredikt in die geheele Werld ; daar sal word gesproken ookal van die, wat em ka doe noe, tot een Gedachtinis van em.

§ 87.

John. 12:9. 10:11.

Moeschi Volk noe van die Jooden a weet dat Em a wees daar, sender a kom niet om die will van Jesus alleen, maar dat sender kan kik Lazarus ookal, die Em a ka wek op van

die Doojen. Maar die Hoog-priesters a hab een Raadslag, dat sender a kan maak ook Lazarus dood ; want om die will van em veel Jooden a loop hen, en a gloof na Jesus.

§ 88.

Die Geschiednis van die Sonndag.

Mat. 21:1-11:14-17. Marc. 11:1-11. Luc. 19:29-46.
Joh. 12:12-19.

En die a geskied die ander Dag toen sender a kom destby Jerusalem na Bethphage en Bethanien by die Olieberg, da Jesus a stier twee van si Jungers, en a see na sender : Loop hen na die Dorp, die lee hier tegen jender over, en aanstonds, wanneer jender kom nabinne, jender sal vind een Eselin die ben gebonden, en een Kaggel met Em, op die noit een Mensch ka set nochal ; loss sender, en bring sender na mi. En as jemand sal see na jender : Voor wat jender doe die ? Soo jender see : Die Heere mankeer sender : En aanstonds em sal latstaan die na jender. Moeschi van die Volk noe, die a ka kom na die Feest, toen sender a hoor, dat Jesus a kom na Jerusalem, sender a neem Takkies van die Palm-Boomen, en a loop nabuttien vor ontmoet Em. En die Jungers die a wees gestiert a loop hen, so as Jesus a ka gebied

na sender en a vind die Kaggel (met die Eselin) gebonden by die Door, buiten, waar die Pad a partie in twee. En toen sender a loss die Kaggel, da die Heeren van dieselyde a see na sender. Voorwarom jender loss die Kaggel: En sender a see, Die Heere mankeer die; en sender a lat die toe. En sender a bring die Eselin met die Kaggel na Jesus, en a lee sender Kleeren op die Kaggel, en Em a set op die. Maar deese allemaal a geskied, dat die a sal word vervoelt, wat a wees gesproken door die Popheet, die see: See na die Dochter van Zion: Kik, joe Kon- ing kom na joe, sachtmoedig, en rie op een Esel, ja op een Kaggel van die Jokdraagend Eselin. Doch si Jungers no a verstaan die toevorn; maar toen Jesus a kom verheer- likt dan sender a dink na die, dat die a wees geskreven van Em, en dat sender a ka doe soo na Em. Toen Em noe a reis voort, moe- schi van die Volk a spreij sender Kleeren na die Pad, en som a kap Takkies van die Boo- men, en a strooy sender na die Pad. En toen Em a kom desby, en a rie die Oliefberg heer, da die geheele Hoop van si Jungers a begin vor pries God met Biskap, en met helder Stem, voor allemaal die machtige Werken die sender a kik. Maar die Volk, die a loop bevoor, en die a volg aster, a roop, en a see:

Hosianna die Soon van David! Geloofd ben Em die kom een Koning in die Naam van die Heere: Gesegend wees die Koningrik van ons Vader David, die kom in die Naam van die Heere. Hosianna in die Hoogte! Vrede wees in die Hemel, en Heerlikheid in die Hoogte! En die Volk die a wees met Em; toen Em a roep Lazarus ut van die Graf, en a wek em op van die Doojen, a getug van die en a roem die Wonder-Werk. Voordarom ook die Volk a loop vor gemoet Em, dat Em a ka doe deese Wonder-Teeken. Maar die Phariseen a see onder malkander: Jender kik, dat jender kan win nietmetal; kik, die geheele Werld loop aster Em. En som van die Phariseen ut die Volk a see na Em: Meester, bestraf doch joe Jungers. En Em a antwoord en a see na sender: As deese sal swieg still, soo die Steen sender sal roep ut, En toen Em a kom naader, soo Em a kik na die Stadt, en a traan-over die, en a see: O! as ook joe nochal na deese joe Tid, a sal weet wat dien tot joe Vrede! maar noe die ben verborgen na joe Oogen; Want die Tid sal kom over joe, dat joe Yanden sal maak een Barrikad, met Wagens rondom joe en joe Kinders, en sal omcingel joe, en sal maak joe benaauwt overal. En sender sal ruineer joe geheel, en no sal latstaan een

Die Volk sender a antwoord Em : Ons ka hoor ut die Wet, dat Christus bliev eewig ; en hoosoo Joe see dan : Die Mensch si Soon moet word verhoogt ! Wie ben dan deese Menschen-Soon. Dan Jesus a see na sender : Een kleen Tid die Licht ben by jender nochal ; wandel, derwil jender hab die Licht, dat die Dusterinis no vall op jender. Wie wandel nabinne die Dusterinis em no weet na waar em loop. Gloof na die Licht, derwil jender hab die, voor dat jender kan wees Kinders van die Licht. Deese Dingen Jesus a see, en a loop wee, en verberg Em selv van sender. En maski Em a doe soo veel W onder-Teekens navoor sender, doch sender no a gloof na Em : voor dat die Woord van die Propheet Jesaias a sal word verwoelt, die em a see : Heere, Wie gloof ons Prediking ! en na wie die Arm van die Heere ben geopenbaart ! Voordarom sender no a kan gloof ; want Jesaias a see weethan : Em ka verbind sender Oogen, en ka verhard sender Hert, dat sender no kik met die Oogen en no verstaan ook met die Hert, en bekeer, en mi genees sender. Deese Dingen Jesaias a see, toen em a kik si Heerlikheid, en a spreek van Em. Doch veel van die Oversten a gloof na Em ; maar om die will van die Phariseseender no a beken die, dat sender no a sal word

utgegooyt van die Synagoge ; Want sender a hab die Eer by die Menschen meer lief, as die Eer by God. Maar Jesus (toen Em a loop wee) a roep en a see : Wie gloof na mi, die gloof niet na mi, maar na Em, die ka stier mi. Mi ka kom na die Werld, een Licht, voor dat wie gloof na mi, no sal bliev na Dusterinis. En wie hoor mi Woorden en no gloof, Mi no sal oordeel em, want mi no ka kom vor oordeel die Werld, maar vor maak die Werld salig. Wie veracht mi, en no neem mi Woorden op, em hab een, die oordeel em : die Woord die mi ka spreek, die sal oordeel em na die laatste Dag. Want mi no ka spreek van mi selv ; maar die Vader die ka stier mi, Em ka gie na mi een Gebod, wat mi sal doe, en wat mi sal spreek. En mi weet dat si Gebod ben die eewig Leev. Voordarom, wat mi spreek, die mi Spreek soo, as die Vader ka see na mi.

§ 90.

Matt. 21 : 17. Marc. 11 : 11. Luc. 21 : 37, 38.

En noe die Avend-Tid a ka kom, Em a verlaat sender, en a loop ut van die Stadt na Bethanien met die Twalf, en a bliev daar. En na Dag Em a leer nabinne die Tempel, maar na die Nacht Em a loop nabuiten, en a bliev

over die Nacht na die Olieberg. En allemaal Volk a kom vroe vroe na Em, nabinne die Tempel vor hoor Em.

§ 91.

Die Geschiednis van die Maandag.

Mat. 21 : 16, 19. Marc. 11 : 12—19. Luc. 19 : 47, 48.

Die ander Dag, toen sender a loop van Bethanien, soo Em a hab Honger. En Em a kik-een Vigie-Boom van veraf, die a hab Blaaren, en Em a kom na die, as altomets Em a sal vind wat op die. En toen Em a kom daar, soo Em a vind nietmetal, as Blaaren alleen, want die Tid no a wees nochal, dat die Vigies a sal wees. En Jesus a see na die Boom : van noe af niemand sal jeet Vrucht van joe in Eewighheid. En si Jungers a hoor die. En aanstonds ook die Vigie-Boom a droog wee. En sender a kom na Jerusalem, en Jesus a loop nabinne die Tempel, en a begin vor gooy ut sender, die a verkoop en koop nabinne die Tempel, en a stoot neer die Tafels van sender, die a set vor reyel Geld, en die Stoelen van sender, die a hab Duffies vor verkoop ; en no a lat die toe, dat eenigste Mensch sal draag een Goed door die Tempel. En Em a leer, en a see na sender : Staan

die dan niet geskreeven : Mi Hoes sal word genaamt een Gebed-Hoes voor allemaal Volk ! maar jender ka maak een Mordenaar-Hool van die. En Em a leer daglik na die Tempel : en die Skrifgeleerden en Hoog-priesters a hoor die, en sender a soek, hoesso sender a sal kan vor maak Em dood ; en sender no a vind, wat sender a sal doe : maar sender a vrees Em, want allemaal Volk a hang na Em, en verwonder sender over si Leering. En na die Avend Em a loop weeraan ut van die Stadt.

§ 92.

Die Geschiednis van die Dinsdag.

Mat. 21 : 20—22. Marc. 11 : 20—20.

En na die naaste Vroevoe sender a passeer voorby, en a kik die Vigie-Boom, dat em a ka droog wee tee na die Wolter. En toen die Jungers a kik die, soo sender a verwonder en a see : Hoesso die Vigie-Boom ka kom droog soo gauw ! En Petrus a dink op die, en a see na Em : Rabbi, kik, die Vigie-Boom die Joe ka vervloek, ka kom droog. En Jesus a antwoord, en a see na sender : Hab Gloof na God. Voorwaar, mi see na jender, as jender hab Gloof, en no twiefel ; soo jen-

der sal doe die niet alleen met die Virgie-Boom, maar as jender sal see na deese Berg: Beweeg joe, en gooy joe nabinne die See; soo die sal geskied. Want wie no hab Twiefel nabinne si Hert, maar gloof die sal geskied, wat em a see; soo die sal geskied ook wat em a see. Voordarom, mi see na jender: All, wat jender bed in jender Gebed, gloof maar, dat jender sal ontvang die, soo jender sal hab die. En wanneer jender staan en bed, soo vergie, as jender hab wat tegen Eenigste, voor dat ook jender Vader, die ben nabinne die Hemel, vergie jender Mishandling. Maar as jender no vergie, soo jender Vader, die ben nabinne die Hemel, ook no sal vergie jender Mishandling.

§ 93.

Matt. 21 : 23—27. Marc. 11 : 27—33. Luc. 20 : 1—4.

En sender a kom na Jerusalem weeraan en die a geskied, toen Em a wandel, en a leer die Volk nabinne die Tempel en a predik die Evangelium, soo die Hoog-priesters en Skriff-geleerden met die Onderlingen, a kom na Em, en a see na Em: Door wat Macht Joe doe deese Dingen! En wie ka gie die Macht na Joe, dat Joe doc deese Dingen! Jesus a antwoorden a see na sender: Mi will vrag jender

een Woord ookal; as jender gie mi Antwoord, soo mi ook will see na jender, door wat Macht mi doe deese Dingen. Die Doop van Johannes, die a wees dan van die Hemel, of van die Menschen! antwoord na mi. En sender a dink by sender selv, en a see: As ons see: Die ka wees van die Hemel, soo Em sal see: Voorwarom jender no ka gloof em dan? Maar as ons see: Die a wees van die Menschen, soo ons moet bang die Volk, en allemaal Volk sal steenig ons; want sender allemaal a hou van Johannes, dat em a wees een ware Propheet. En sender a antwoord en a see na Jesus: Ons no weet die. En Jesus a see na sender: Soo mi ookal no sal see na jender door wat Macht mi doe deese Dingen.

§ 94.

Matt. 21 : 28—32. Marc. 12 : 1.

En Em a begin vor spreek na sender door Gliknissen: Maar wat jender dink? Een Man a hab twee Soons, en em a kom na die eerste, en a see: Mi Soon, loop hen, en werk van Dag na mi Wienberg. En em a antwoord, en a see: Mi no will doe die. Asteeran die a berouw em, en em a loopen. En die Man a kom na die tweede, en

a see dieselvde Woorden. Maar em a ant-woord en a see: Heere, Ja! en em no a loopen. Welk van die twee ka doe die Will van die Vader! Sender a see na Em: Die eerste. Jesus a see na sender: Voorwaar, mi see na jender: die Tollenaars en die Hoeren, sal kom wel eerder nabinne die Koningrik van die Hemel, as jender. Johannes a kom na jender, en a leer jender die Pad van Ge-rechtigheid, en jender no a gloof em; maar die Tollenaars en die Hoeren a gloof em. En maski jender a kik die, jender doch no a be-rouw die, dat astartan jender a sal ka gloof em ookal.

§ 95.

[Matt. 21: 33—46. Marc. 12: 1—12. Luc. 20: 9—19.]

Hoor een ander Gliknis: Daar a wees een Hoës-Vader, die a plant een Wienberg, en a maak een Transchee rond om die, en a dig een Wienporsch nabinne die, en a bouw een Toren, en a huer die ut na die Wiengartmans, en a reis voor een lang Tid na een ver Land. En toen die Tid van die Vruchten a nader, soo em a stier een van si Dienstknechten na die Wiengartmans, dat em a sal ontvang die Vruchten. Maar sender a neem em, en a slaa em, en a stier em leeg wee van sender.

Weeraan em a stier een ander Dienstknecht na sender, na dieselvde sender a gooy Steen, en a breek si Kop, en a latstaan em loop geskimpert wee van sender. Weeran em a stier die derde, maar dieselvde sender a maak dood. En weeraan em a stier ander Dienst-knechten, meer as die eerste a wees; en sen-a doe met dieselvde op glik Manier. En die Heere van die Wienberg a hab noch een eenig Soon, die a wees em lief; en em a see: Wat mi sal doe? Mi will stier mi liefe Soon, alomets, wanneer sender kik em, sender sal respekteer em. En op laatst em a stier die-selvde ook na sender. Maar toen die Wien-gartmans a kik die Soon, da sender a see na malkander: Deese ben die Erfe, kom, lat ons maak em dood, en lat ons bring si Erf-goed na ons. En sender a neem, en a gooy em ut van die Wienberg, en a maak em dood. Wanneer noe die Heere, van die Wienberg sal kom, wat em sal doe dan na deese Wien-gartmans! Sender a see na Em: Em sal bederv deese Quatdochers miserabel, en sal huer si Wienberg ut na ander Wiengartmans, die leveer die Vruchten na die recht Tid na em.

Jesus a see: Ja! Em sal kom en bederv deese Wiengartmans, en gie die Wienberg na ander Volk. Toen sender a hoor die, sen-

der a see: Die wees werwee! Maar Em a kik na sender en a see: Jender ka lees dan nooit in die Skrift: Die Steen, die die Bonw-Meesters ka gooy wee, die ka kom een Hoofdsteen na die Hoek; van die Heere die ka geskied, en die ben wonderbaar na ons Oogen. Voordarom mi see na jender: Die Koningrik van God sal word genomen van jender, en sal word gegeven na die Heidens, die sal bring si Vruchten. En wie vall op deese Steen, die sal breek, maar op wie em vall, die em sal morsel tot Poejer. En toen die Hoog-priesters en die Phariseen a hoor si Gliknissen, soo sender a bemerk, dat Em a spreek van sender. En na dieselvd Uur sender a soek vor vass Em, maar sender a bang die Volk, want die Volk a hou Em vor een Propheet.

§ 96.

Matt. 23: 1-14.

En Jesus a spreek weeraan door Gliknissen na sender, en a see: Die Koningrik van die Hemel ben glik een Koning, die a maak een Bruilooft voor si Soon; en a stier si Dienstknechten ut, vor roep die Genooite na die Bruilooft, en sender no a will kom. Weeraan em a stier ander Dienstknechton ut, en

a see: See na die Genooiten, kik, mi ka bereid mi Maaltid, mi Ossen en mi vet Vee ben geslacht, en alle Dingen ben bereid, kom na die Bruilooft. Maar sender a veracht die, en a loop hen, die een na si Planthey die ander na si Koopmanskap; maar som a vass si Dienstknechten, a spot sender, en a maak sender dood. Toen noe die Koning a hoor die, soo em a kom toornig; en a stier si Armee ut, en a bederv deese Moordenars, en a stek sender Stadt na Brand. Dan em a see na si Dienstknechten: Die Bruilooft ben wel bereid, maar die Genooiten no a wees die waardig. Voordarom loop hen na die Straaten, en nooi na die Bruilooft, soo veel as jender vind. En die Dienstknechten a loop ut na die Straaten, en a bring malkander soo veel as sender a vind, quaje en goeje, en die Tafels allemaal a kom voll. Da die Koning a kom nabinne, vor kik die Gasten, en em a kikk daat een Mensch, die no a hab een Bruilooftkleed aan; en a see na em: Vriend, hoesoó joe ka kom hier nabinne, en joe hab doch niet die Bruilooft-Kleed aan! Maar em a verstom. Dan die Koning a see na si Dienstaars: Bind em Handen en Voeten, en gooy em na die buitenste Dusteris, daar sal wees Gekrisc en Kneersing van Tanden. Want moeschiben geroepen, maar wenig ben utverkiesen.

Matt. 23: 15—22. Marc. 12: 13—17. Luc. 20: 20—26.

Dan die Phariseen a loop hen, en a hou een Raad, hoosoo sender a sal vang Em in si Woorden. En sender a hou Wach over Em, en a stier som van sender Jungers, met die Herodianer, die sal loer op Em en die a sal stell sender selv as rechtreedige Menschen, voor dat sender a kan vang Em na si Woord, vor overleveer Em na die Overheid, en na die Macht van die Gouverneur: En toen sender a kom, sender a vrang en a see na Em: Meester, ons weet, dat Joe ben waarachtig, en Joe keer voor niemand, want Joe no regardeer die Aansien van die Menschen, maar Joe leer die Pad Gods in Waarheid. Voordarom see na ons, wat Joe dink! Die ben dan recht vor gie Skatgeld na die Keyser, of niet! Ongesal gie die dan, of ons no sal gie die! Maar Jesus a bemerk sender Valscheid en Huchelerie, en a see na sender: Jender Huchelaars, voor wat jender versoek mi dan! Wies na mi een Stuk van die Skatgeld, dat mi kik die. En sender a breng na Em een Penning. En Em a see na sender: Van wie die Beeld en Opskrift ben! Sender a see na

Matt. 23: 23—33. Marc. 12: 16—27. Luc. 20: 27—39.

Em: Van die Keyser. Dan Em a see na sender: Voordarom gie na die Keyser, wat van die Keyser ben, en na God, wat van God ben. En sender no a kan vind Fant na si Woorden navoor die Volk, en a verwonder sender over si Antwoord, a swieg still, verlaat Em, en a loop wee.

Na dieselvde Dag die Sadduceen a kom na Em, die hab die Meening, dat no ben een Opstanding, en a vrang Em, en a see: Meester, Moses ka skriev na ons. As een Man si Broeder dood, en lat aster em een Wif en niet Kinders, soo si Broeder sal neem dieselvde si Wif, en verwek Saad voor si Broeder. Noe daar ka wees by ons seven Broeders. Die eerste a neem een Wif, en a dood, en no a latstaan Saad: en die tweede a neem em, en a dood, en no a latstaan Saad ookal: en die derde even so; en all die seven, a neem em, en no a latstaan Kinders; op laatst, aster sender allemal, die Wif a dood ookal. Noe dan na die Opstanding, wanneer sender staan op, welk van sender si Wif em sal wees! want seven a hab em tot Wif. En Jesus a

antwoord en 'a see na sender: Da no so die ben? Jender dwaal, voordarom, dat jender weet nietmetal van die Skrift, ook niet van die Kracht van God. Die Kinders van deese World vry en lat vry sender; maar sender die sal wees waerdig gerekend, vor beerv die ander World, en die Opstanding van die Doojen, sender no sal vry, of lat vry sender. Want sender no kan dood verder; voordoor sender ben glik die Engels na die Hemel, en ben Kinders van God, derwil sender ben Kinders van die Opstanding. Maar van die Doojen dat sender sal staan op, jender ka lees dan niet in die Boek van Moses, hoeso God a see na em in die Bosch, en a spreek: Mi ben die God van Abraham, en die God van Isaac, en die God van Jacob. Noe God no betr een God van die Doojen, maar van die Leeverdingen, want sender allemaal leev' voor Em. Voordarom jender dwaal goe. Da som van die Skrifgeleerden a antwoord en 'a see, Meester, Joe ka see recht.

§ 99.

Matth. 52: 34—46. Marc. 12: 28—37. Luc. 20: 40—44.

Maar toen die Pharissee a hoor, dat Em a ka stop die Sadduceen sender Mond, soo sender a kom makander. En een van sender,

een Skrifgeleerde, die a ka hoor hoeso seender a hab Vraagen onder makander, en a kik, dat Jesus a ka antwoord wel na sender, a kom na Em, en versoek Em, en a see: Meester, welk ben die grootste Gebod in die Wet? Jesus a antwoord em. Die grootste Gebod van allemaal Geboden ben die: Hoor O Israel; die Heere ons God ben een enig God; en joe sal hab God, joe Heere, lief van geheele Hert, van geheele Siel, van geheele Gemoed, en van allemaal joe Krachten: Die ben die grootste Gebod. En die tweede ben glik na die: Joe sal hab joe Naaste lief, soo as joe selv. Die no hab een ander meer groot Gebod as deese. Na deese twee Geboden hang die geheele Wet en die Propheeten. En die Skrifgeleerde a see na Em: Meester, Joe ka spreek waarlik recht, want die ben Een God, en die no hab een ander as Em. En Joe heb Em lief van geheele Hert, van geheele Gemoed, van geheele Siel, en van allemaal Krachten, en vor hab die Naaste lief, soo as si selv, die ben meer as Brand-Offen en allemaal Offer. Toen Jesus a kik noe, dat em a antwoord verstandig, soo Em see na dieselvde: Joe no ben ver van die Koningrik van God. Toen noe die Pharissee a wees by makander, Jesus a vraag sender, toen Em a leer nabinne die Tempel, en a see: Hoeso

die Skrifgeleerden see dan, dat Christus ben die Soon van David? Wat *jender* dink van Christus? Wie si Soon Em ben? Sender a see: Die Soon van David. Em a see na sender: Hoesoo David roep Em dan in die Geest si Heere. Want em selv, David see in die Psalm-Boek toen em a spreek door die heilig Geest; Die Heere ka see na mi Heere: Set Joe na mi rechter Hand, tee mi lee Joe Vyanden tot die Voetbank van Joe Voeten. Soo David roep Em ja si Heere, hoesoo Em ben dan si Soon? En niemand a kan antwoord een Woord na Em, en niemand a dert ook van die Dag af verder vraag Em. En veel Volk a hoor Em gern.

§ 100.

Mat. 23: 1-39. Marc. 12: 38-40. Luc. 20: 45, 46, 47.

Toen noe allemaal Volk a hoor, Jesus a see na si Jungers: Die Skrifgeleerden en Phariiseen set op die Stoel van Moses. Allemaal noe wat sender see na jender, dat jender sal hort, jender hou en doe die; maar aster sender Werken jender no sal doe; sender see die wel, en no doe die. Voordarom, Bewaar jender van die Skrifgeleerden: Want sender bind swaare Dragten, die ben quaalik vor draag, en lee sender op die Skouders van die

Menschen, maar sender selv no will roer na dieselvo met een Vinger. Maar sender doe allemaal sender Werken, voor dat die Menschen kan kik sender. Sender wandel in lang Kleeren, en maak sender Dink-Cedels breed, en die Soomen na sender Kleeren groot. Sender set gern na die boven Plats van die Tafel, en in die Skoelen, En will die goe, dat Volk groot sender op die Markt, en roep sender Rabbi. Maar jender no sal lat roep jender Rabbi, want Een ben jender Meester, Christus; en jender allemaal ben Broeders. En jender sal roep niemand Vader op Aarde, want een ben jender Vader, die ben nabinne die Hemel. En jender no sal lat roep jender Leeraars, want Een ben jender Leeraar, naamlik Christus. Die grootste onder jender sal wees jender Dienaar. Want wie verhoog si selv, die sal word verneedert, en wie verneeder si selv die sal word verhoogt. Maar Ongelukkig jender ben, Skrifgeleerden en Phariiseen, jender Huichelaars! want jender slot toe die Koningrik van die Hemel voor die Menschen; jender selv no kom nabinne, en sender die seek vor kom in, die jender no lat kom nabinne. Ongelukkig jender ben, Skrifgeleerden en Phariiseen, jender Huichelaars! want jender jeet op die Hoesen van die Weduwen, en onder een

Skien maak lange Gebeden, voordarom jender sal ontvang een meer groot Verdoenmis. Ongelukkig jender ben, jender Huichelaars! want jender reis rond na Land en na See, vor maak een Jooden-Genoot, en wanneer Emben die, soo jender maak em een Kind van die Hell, tweedobbel heer, as jender selv ben. Ongelukkig jender ben, jender blinde Leyds-mans, die see: Wie sweer by die Tempel, die ben nietmetal; maar wie sweer by die Gond van die Tempel, die ben skuldig. Jender Dwassen en Blinden! wat ben dan meer groot, die Gond, of die Tempel, die maak die Gond heilig! En wie sweer by die Altaar, die ben nietmetal; maar wie sweer by die Offer, die ben op dieselvd, die ben skuldig. Jender Dwassen en Blinden, wat ben dan meer groot, die Offer, of die Altaar die maak die Offer heilig! Voordarom wie sweer by die Altaar, die sweer by dieselvd, en by allemaal, wat ben op die. En wie sweer by die Tempel die sweer by dieselvd, en by Em, die woon nabinne die. En wie sweer by die Hemel, die sweer by die Tron van God, en by Em die set op die. Ongelukkig jender ben, Skrifgeleerden en Phariseen jender Huichelaars! want jender betaal die Tiende van Münt, Dill en Komyn, en lat blier astetrut die wichtigste van die Wet, naamelik die

Oordeel, die Barmhertigheid en die Geloof. Deese Dingen Volk sal doe, en no latstaan die ander. Jender blinde Leydsmans, jender kan passeer wel een Muskit door, en slok in een Kameel. Ongelukkig jender ben, skrifgeleerden en Phariseen jender Huichelaars! die hou die Drink-beekers en Skötels skoon van butten, maar van binnen sender ben voll van Roov en Onmatigheid. Joe blinde Pharisee, skoon vooreerst na die Drinkbeekers en Skötels wat ben nabinne, dat die kom skoon ookal, wat ben van butten. Ongelukkig jender ben, Skrifgeleerden en Phariseen, jender Huichelaars! want jender ben glik as die wetgepleisterte Graven, die skien wel mooi van butten, maar van binnen sender ben voll van Doodsbeenden en allemaal Onreinigheid. Soo jender ookal: van butten jender skien rechtveerdig navoor die Menschen; maar van binnen jender ben voll van Huichelerie en Ongerechtigheid. Ongelukkig jender ben, Skrifgeleerden en Phariseen, jender Huichelaars! want jender bouw die Graven van die Propheeten op, en maak Cieraad na die Graven van die Rechtveerdigen, En see: As ons a sal ka wees na die Tid van ons Vaders, soo ons no a sal ka neem Part met sende der na die Bloed van die Propheeten. Soo jender gie dan Getugnis over jender selv, dat

jender ben Kinders van sender, die ka maak die Propheeten dood. Jender ookal verwoell dan die Maat van jender Vaders. Jender Slangen, jender Addern—Geslacht, hoesoos jender will escapeer die Verdoemnis van die Hell? Voordantom kik, mi stier na jender Proopheeten, en Wiesen, en Skrifgeleerden, en jender sal maak som van dieselwde dood, en sal kroesig sender, en sal geesel som van sender nabinne jender Skoelen, en sal vervolgsender van een Sladt na die ander, voor dat kom op jender all die rechtveerdig Bloed, die ben vergooten op die Aarde, van die Bloed van die rechtveerdige Abel af, tee die Bloed van die Zacharias, die Soon van Barachias, die jender ka maak dood tuschen die Tempel en die Altaar. Voorwaar, mi see na jender, dat all deese Dingen sal kom over deese Geslacht.

Jerusalem, Jerusalem, joe, die maak die Propheeten dood, en steinig sender, die ben gestiert na joe! hoe meenigmaal mi ka will vergader joe Kinders, glik as een Hoener vergader si Kikinijes na onder si Vlerken, en jender no ka will! Kik, jender Hoers sal word woest gelaten voor jender. Want mi see na jender: Van noe af jender no sal kik mi, tee jender see: Gesegend Em ben, die kom in die Naam van die Heere.

§ 101.

Marc. 12: 41, 44. Luc. 21: 1—4.

En Jesus a set Em tegen over die Skat-Kist, en a kik hoesoos die Volk a gooy Geld nabinne die Skat-Kist. En veel van die rik Volk a gooy moeschi nabinne. Maar Em a kik ook een aerm Weduwe die kom, en a gooy twee kleen Penning's nabinne, die ben (omtrent) een Quart van een Stuber. En Em a roep si Jingers na Em, en a see na sender: Voorwaar, mi see na jender: Deese aerm Weduwe ka gooy meer nabinne die Skat-Kist, as sender allemaal, die ka gooy nabinne. Want deese allemaal ka gooy nabinne van sender Overvloet, tot die Offer van God; maar em ka gooy nabinne van si Aermoed, all si Naaring die em a hab.

§ 102.

Matt. 24: 1—51. Marc. 13: 1—37. Luc. 21: 5—36.

En Jesus loop wee ut van die Tempel: en si Jingers a kom na Em, dat sender a will wies Em die Gebouw van die Tempel; en som van sender a see, dat die a wees verciert met excellent Steenen en Kostlikheid; en een van si Jingers a see na Em;

Meester, kik wat Steenen, en wat een Bouw die ben! En Jesus a antwoord en a see na em: Jender kik dan niet all deese Dingen! die groot Gebouw! Voorwaar mi see na jender; Die Tid sal kom, dat van all die, wat jender kik, niet een Steen sal bliev op die ander, die no sal word afgebrooken.

En toen Em a set op die Olijf-Berg, tegen over die Tempel, da si Jungers Petrus en Jacobus, Johannes en Andreus, a kom apart na Em, en a vraag Em, en a see: Meester, see na ons, wanneer deese Dingen sal geskied? en welk sal wees die Teeken van Joe Toekomst, en van die End van die Werld?

En Jesus a antwoord, en a see na sender: Passop, dat niemand verley jender. Want veele sal kom onder mi Naam, en see: Mi ben Christus, en die Tid ka kom destby; en sender sal verley veele. Voordarom no volg sender. En jender sal hoor van Oorlog en Geskrouw van Oorlog. Een wanneer jender sal hoor van Oorlog en Oproer, soo jender no sal verskrrik, want all deese Dingen moet geskied toevorn; maar die End no ben da soo gauw nochal. Dan Em a see na sender: Een Volk sal staan op tegen die ander: en een Koningrik tegen die ander, en groot Aardbeevingen sal geskied hier en daar; en die sal hab Honger-Tid en Pestienz; ook

skriklike Dingen en groote Teekens sal geskied van die Hemel: doch die sal wees erst die Begin van die Nood. Maar jender wach jender selv; want bevoor all deese Dingen, sender sal lee die Handen na jender, en sal vervolg jender, en sal overleveer jender na-voor die Raad-Hoesen, en nabinne sender Skoelen, en Gevangnissen. Jender sal krier slaa en moet word geleyd navoor die Vorsten en Koningen om die will van mi Naam. Sender sal maak jender dood: en allemaal Natiën sal haat jender, om die will van mi Naam. En die sal geskied na jender tot-een Getugnis over sender. Wanneer sender sal ley jender dan hen, vor overleveer jender, soo wees niet besorgt, wat jender sal spreek, en no dink over die toevorn; maar wat na dieselvde Ur sal word gegeven na jender, die jender spreek: Want jender no ben die, die spreek, maar die heilig Geest. Want mi will gie na jender Mond en Wiesheid, soo dat allemaal jender Vyanden no sal kan spreek of staan tegen die.

Dan moeshi sal erger sender, en sal ver-rand malkander, en sal haat malkander. En een Broeder sal overleveer die ander na die Dood, en die Vader die Soon, en die Kinders sal staan op tegen sender Onders, en sal help vor maak sender dood; maar niet een Haar

van jender Hoofd sal bederv. Vat jender Sielen met Patience.

En veel valsche Propheeten sal staan op, en sal verley moeschi. En derwil die Ongerechtigheid sal neem die Overhand, soo die Liefde sal verkoud na moeshi; maar wie hou ut tee na die End, die sal kom salig. En die Evangelium van die Koningrik sal word gepredikt na die geheele Werld, tot een Getingnis over allemaal Natien, en dan die End sal kom.

Maar wanneer jender sal kik, dat Jerusalem ben omcingelt met een Arnee, dan bemerk, dat si Verwoesting ka kom deshy, die ben die Grouwel van die Verwoesting, van die, die Propheet Daniel ka see, dat dieselvde staan waar die no sal staan, na die heilige Plaats. (Wie lees die, em merk op die.) Dan vlucht nabovo die Bergen, wie ben in Judea; en wie ben na middel van die Stadt, die trek ut; en wie ben op die Land, die no kom nabinne. En wie ben op die Dak, die no kom neer, vor haal eenigste Ding ut van si Hoes; en wie ben na die Veld, die no keer om weeraan, vor haal si Kleeron. Want die ben die Dagen van Waak, voor dat allemaal wat ben gestreeven, sal kom verwoelt.

Maar ongelukkig sender ben, die ben Swanger, en sender, die gie Sug na dieselvde

Dagen! Doch bed, dat jender Vitch, no moet geskied na die Winter, of na een Sabbath-Dag. Want na deese Dagen sal wees, van soo groot Droefnissen, as nooit ka wees, vancs die Creatur si Begin, die God ka maak, en soo, as ook no sal kom weeraan; en groot Nood sal wees op die Aarde, en een Toorn over deese Volk. En sender sal vall door die Skerpte van die Sweerd, en sal word gewangen, en geleyd onder allemaal Natien, en Jerusalem sal word vertrap van die Heidens, tee die Tid van die Heidens sal word verwoelt. En as deese Dagen no a sal kom verkort, soo niet een Mensch a sal word salig; maar om die will van die Uverkiesen sender dieselvde Dagen sal word verkort. As jemand dan sal see na jender: Kik, hier ben Christus, of daar Em ben, soo jender no sal gloof die. Want valsche Christussen, en valsche Propheeten sal staan op, en sal doo groot Teekens en Wonders, soo dat ook die Uverkiesen sender, as die a sal wees mogilk, sal word verleyd na die Dwaaling. Maar jender passop, kik mi ka see all deese Dingen, na jender toevorn. Voortdaom as sender sal see na jender: Kik, Em ben nabinne die Woestyne, soo jender no loop nabuten; kik, Em ben nabinne die Kammer, no gloof die. Want glik as die Blixem'kom

ut van die Oost, en skien na die West, soo die Toekomst van die Mensch si Soon sal wees ookal. Want waar die dooje Lichaamen, daar die Arenden sal vergader sender.

En aanstonds aster die Droefnis van die selvde Tid, Teekens, sal geskied na die Son en Maan en Sterren. Die Son en die Maan sal verloor sender Skien, en die Ster sender sal vall van die Hemel; en na die Mensch sender op die Aarde sal wees bang, en sal kom twiefelmoedig; en die See en Water-Golven sal gie groot Geluit. En die Mensch sender sal kom flauw van Vrees en Verwachting van die Dingen, die sal kom op die Aarde: want ook die Krachten van die Hemel sal beweeg sender. En dan die Teeken van die Mensch si Soon sal verskien na die Hemel, en dan allemaal Geslachten op die Aarde sal lamenteer; en sender sal kik die Mensch si Soon kom in die Wolken van die Hemel, met groote kracht en Heerlikheid. En Ein sal stier si Engels met helder Trompeeten en sender sal vergader si Uterkione van die vier Winden, van die een End van die Hemel tee na die ander.

Maar wantêr deese Dingen begin vor geskied, dan kik op, en lecht op jender Hoofden, voordarom dat jender Verlossing ben destby. En Ein a see na sender een Gliknis: Kik na

die Vigie-Boom, en na allemaal Bømmen. Wanneer sender begin noe vor spruit ut, soo jender kik na sender, en bemerk, dat die Sommer ben destby. Soo jender ookal, want neer jender kik, dat all deese Dingen begin vor geskied, soo weet, dat die Koningrik van God ben destby: Vootwaar mi see na jender: Deese Geslacht no sal vergaan, tee all deese Dingen ka geskied. Hemel en Aarde sal vergaan, maar mi Woorden no sal vergaan. Maar van dieselvde Dag en van die Ur weet niemand, ook niet die Engels, die ben nabinne die Hemel, ook die Soon niet, maar alleen die Vader.

Maar wach jender selv, dat jender Herten no kom beswart met Brasserie en Dronkenskap, en met Sorgen van Naaring, en dat deese Dag no kom skielig over jender. Want glik as een Vangstrop die sal kom over sender allemaal, die woon op die Aarde. Maar glik as die a wees na die Dagen van Noah soo die Toekomst van die Mensch si Soon sal wees ookal. Want glik as sender a wees na die Dagen bevoor die Sond-Vloet, sender a jeet, sender a drink, sender a vry en a lat vry sender, tee na die Dag dat Noah a loop nabinne die Ark. En sender no a keer, voor die, tee die Sond-Vloet a kom, eh a neem sender allemaal wee. Soo die Toekomst

van die Mensch si Soon sal wees ookal. Dan twee sal wees na die Veld, die een sal word aangenomen, en die ander sal word verlaten. Twee (Vrouwen) sal mola na die Molen, die een sal word aangenomen, en die ander sal word verlaten. Voordarom jender wees hoe wakker altid, en bed, dat jender kan wees waerdig gereekend, vor escapeer all deese Dingen die sal geskied, en vor staan navoor die Mensch si Soon. Want jender no weet, na welk Uur jender Heere sal kom. Glik as een Mensch, die a reis na een ver Land, en a verlaat si Hoes, en a gie Macht na si Dienst-Knechten, en na elkeen si Werk, en a commandeer die Wach-man, vor hou Wach. (Soo mi see ook na jender wach.) Maar deese jender sal weet, as een Hoes-Vader a sal weet, na welk Uur die Dief a will kom, soo em a sal hou wel Wach, en no lat-staan breek nabinne si Hoes. Voordarom jender wees bereid ookal, want die Mensch si Soon sal kom na soo een Uur, as jender no dink.

Wie ben dan een getrouwe en voorsichtige Dienst-Knecht, die si Heere ka set, vor reger si Dienst-Volk, vor gie Jeet na sender na die recht Tid! Geluksalig ben die Dienst-Knecht, wanneer si Heere kom, en vind em do' soo. Voorwaar mi se na jender: Die

Heere sal set em over allemaal si Goed. Maar as een quaaie Dienst-Knecht, sal see nabinne si Hert: Mi Heere no kom nochal lang Tid; en sal begin vor slaa si Met-Dienst-Knechten, en vor jeet en drink met die Dronkmans: Soo die Heere van dieselvdie Dienst-Knecht sal kom na die Dag, wanneer em no verwrecht die, en na die Uur, wanneer em no dink op die; en sal versplit em, en sal gie na em si Loon met die Huichelaars, daar sal wees Gekrisch en Kneusing van Tanden. Soo jender wach dan, want jender no weet, wanneer die Heere van die Hoes sal kom, as Em sal kom na Avend, of na middel van die Nacht, of wanneer die Ilaan kraay, of na vroevoe. Dat Em no kom skielik, en vind jender na Slaap. Maar wat mi see na jender, die mi see na allemaal: Wach!

§ 103.

Matt. 25 : 1—6 ; 26 : 1—5. Marc. 14 : 1, 2. Luc. 22 : 1, 2.

Dan die Koningrik van die Hemel sal wees glik tien Jongvrouwen, die a neem sender Lampen, en a loop ut, vor gemoet die Bruidgom. Maar vyf van sender a wees dwaas, en vyf a wees wies. Die Dwansen a neem sender Lampen, maar sender no a neem Olie

met sender. Maar die Wiesen a neem Oie nabinne sender Vajjes, met sender Lampen. Toen noe die Bruidigom a vertoef, soo sender allemaal a kom slaaperig, en a vall na Slaap. Maar na middel van die Nacht a gekied een Geroep: Kik, die Bruidigom kom, loop noe, vor gemoet Em! Dan alldeese Jongvrouwen a staan op, en a vercier sender Lampen. Maar die Dwaassen a see na die Wiesen: Gie ons van jender Oie, want ons Lampen gaan ut. Da die Wiesen a antwoord en a see: Niet soo, voor dat niet ons en jender hab Mankement; maar loop hen na die Verkoopers, en koop voor jender selv. En toen sender a loop hen, vor koop, soo die Bruidigom a kom, en sender, die a wees bereid, a loop met Em nabinne, tot die Bruidigom, en die Door a word gesloten. Asteraan die ander Jongvrouwen a kom ookal, en a see: Heere, Heere, open voor ons. Maar Em a antwoord en a see: Voorwaar, mi see na jender: Mi no ken jender. Voordarom wach, want jender no weet die Dag en die Ur, wanneer die Mensch si Soon sal kom. Want die Koningrik van die Hemel ben glik as een Mensch, die a reis na een ver Land, a roep si Dienst Knechten, en a leveer na sender si Goed. En na die een em a gie vyf Talenten, na die ander twee, en na die derde

een; na elkeen soo, as si Vermoogen a wees, en a reis wee aanstonds. Dan em die a ka ontvang die vyf Talenten, a loop hen, en a handel met dieselvde, en a win ander vyf Talenten. Glik soo em ookal, die a ka ontvang twee Talenten, a win ook twee ander. Maar em, die a ka ontvang die een, a loop hen, en a dig een Gat na die Arde, en a verberg die Geld van si Heere. Aster een lang Tid die Heere van deese Dienst-Knechten a kom, en a hou Reekenskap met sender. En soo em, die a ka ontvang die vyf Talenten, a kom en a lee ander vyf Talenten daar, en a see: Heere, joe ka gie vyf Talenten na mi, kik, mi ka win met dieselvde ander vyf Talenten. Da si Heere a see na em: Wel joe goeje en getrouwe Dienst-Knecht, joe ka wees getrouw over weenig Dingen, mi will set joe over moeschi; loop nabinne tot die Blikskap van joe Heere. Dan die ander a kom ookal, die a ka ontvang die twee Talenten, en a see: Heere, joe ka gie twee Talenten na mi, kik, mi ka win twee ander met dieselvde. Si Heere a see na em: Wel, joe goeje en getrouwe Dienst-Knecht, joe ka wees getrouw over weenig Dingen, mi will set joe over moeschi; loop nabinne tot die Blikskap van joe Heere. Dan em, die a ka ontvang die een Talent, a kom

ookal, en a see : Heere, mi a weet, dat joe ben een hard Man, joe snie, waar joe no ka saay, en joe gaar in, waar joe no ka strooy ut ; en mi a bang, en a loop hen, en a verberg joe Talent nabinne die Aarde : kik, daar joe hab, wat ben van joe. Maar si Heere a antwoord en a see na em : O joe quaja en looje Dienst-Knecht, as joe a weet, dat mi snie, waar mi no ka saay, en dat mi gaar in, waar mi no ka strooy ut ; soo joe a sal ka doe mi Geld na die Wisselaars, en dan, wanneer mi a ka kom, soo mi a sal ka ontvang mi eigen met Interess. Voordarom neem die Talent van em, en gie die na em, die hab tien Talenten. Want na elkeen, die hab, sal word gegeven, en em sal hab Overvloet : maar van em, die no hab, sal word genomen ookal, wat em a hab. En die onprofitabel Dienst-Knecht jender gooy ut na die utterste Dustarinia, daar sal wees Gekrisch en Kneersing van Tanden.

En wanneer die Mensch si Soon sal kom in si Heerlikheid, en all die heilige Engels met Em, dan Em sal set op die Troon van ti Heerlikheid. En allemaal Naticen sal word vergandert navoor Em, en Em sal separeer sender van malkander, glik as een Herder separeer die Skaapen van die Bokken. En Ern sal stell die Skaapen na si rechter Hand, en die Bokken na si slinker Hand. Dan die Ko-

ning sal see na sender, die ben na si rechter Hand : Kom, jender gesegende van mi Vader, beerv die Koningrik, die ben bereid voor jender van die Begin van die Werld. Want mi ka wees hongereg, en jender ka gie mi vor jeet : Mi ka wees dorstig, en jender ka gie mi vor drink : Mi ka wees een Vremdeling, en jender ka gie mi Herberg : Mi ka wees naakt, en jender ka kleed mi : Mi ka wees siek, en jender ka besoek mi : Mi ka wees na die Gevangnis, en jender ka kom na mi. Dan die Rechtveerdigen sal antwoord na Em, en see : Heere, wanneer ons ka kik Joe hongereg, en ka gie jeet na Joe ? of dorstig, en ka gie na Joe vor drink ? Wanneer ons ka kik Joe as een Vremdeling, en ka gie na Joe Herberg ? of naakt, en ka kleed Joe ? Wanneer ons ka kik Joe siek, of na Gevangnis, en ka kom na Joe ? En die Koning sal antwoord, en see na sender : Voorwaar mi see na jender : Wat jender ka doe na een van *dese* mi mindeste Broeders die jender ka doe na *mi*. Dan Em sal see ook na sender, die ben na si slinker Hand : Loop wee van mi, jender Vervloekten, na die eewig Vuur, die ben bereid voor die Duvel en voor si Engels. Mi ka wees hongereg, en jender no ka gie mi vor jeet : Mi ka wees dorstig, en jender no ka gie mi vor drink : Mi ka wees een Vremdeling, en jender

der no ka gie mi Herberg : Mi ka wees naakt, en jender no ka kleed mi : Mi ka wees siek en gevangen, en jender no ka besoek mi. Dan deese ookal sal antwoord na Em en a see : Heere, wanneer ons ka, kik Joe hongereg, of dorstig, of een Vremdeling, of naakt, of siek, of na Gevangnis, en no ka dien Joe ! Dan Em sal antwoord na sender en see ; Voorwaar, mi see na jender : Wat jender no ka doe na een van deese mindeste, die jender ook no ka doe na mi. En deese sal loop wee na die ewig Pien, maar die Rechtvaardigen na die ewig Leev.

En die a geskied, toen Jesus a ka vollend all deese Woorden, soo Em a see na si Jungers : Jender weet, dat aster twee Dagen die Passa-Feest ben, en die Mensch si Soon sal word overleveert, vor word gekroesigt.

Na die Tid die Hoogpriesters, en die Skrifgeleerden, en die Onderlingen van die Volk a vergader sender nabinne die Palee van die Hoogpriester, die a wees genaamt Caiphas, en a hou een Raad, hoesoos sender a sal kan vass Jesus met Listigheid, voor maak Em dood. Doch sender a see : Niet na die Feest-Dag, dat niet een Oproer kom onder die Volk ; want sender hang die Volk.

Die Geschiednis van die Wonsdag.

Joh. 13 : 1—30. Luc. 22 : 3.

Noe bevoor die Passa-Feest, toen Jesus a weet, dat si Uur a ka kotm, dat Em a sal loop na van deese Werld na die Vader ; en soo bis Em a ka hab lief si Eigen sender, die a wees in die Werld, soo Em a hab sender hef tee na die Ehd. En aster die Avendmaaltid, toen die Duvet a ka gie die al nabinne die Hett van Judas Iscarioth, Simon si Soon, dat em a sal verraad Em ; en Jesus a weet, dat die Vader a ka gie alle Dingen na si Handen, en dat Em a ka kotm van God, en a loop na God ; soo Em a staan op van die Avendmaaltid, a lee si Kleeren af, en a neem een linnen Doek, en a omgort si selv. Astetaan Em, a gooy Water nabinne een Bak, en a begin vor wasch si Jungers sender Voeten, en a droog sender met tie linnen Doek, met die Em a twees omgort. Soo Em a kom na Simon Petrus, en dieselvde a see na Em : Heere, Joe sal wasch dan mi Voeten ! Jesus a antwoord en a see na em : Wat mi doe, die joe no weet noe, maar asteraan joe sal verstaan die. Da Petrus a see na Em : Nooit Joe sal wasch mi Voeten. Jesus a antwoord

em : As mi no sal wasch joe, soo joe no hab Part met mi. Simon Petrus a see na Em : Heere, niet die Voeten alleen, maar ook die Handen en die Hoofd. Jesus a see na em : Wi gewaschen ben, die no hab noodig, as alleen vor wasch die Voeten, maar em ben geheel rein ; en jender ben rein, doch niet allemaal. Want Em a weet wel, wie a sal ver-raad Em ; voordarom Em a see : Niet jender allemaal ben rein.

Toen Em a ka wasch noe sender Voeten, soo Em a neem si Kleeren, en a set Em neer weeraan, en a see na sender : Jender weet dan, wat mi ka doe na jender ! Jender roep mi Meester en Heere, en jender see wel, want mi ben die ook. As noe mi, jender Heere en Meester, ka wasch jender Voeten, soo jender ookal sal wasch die Voeten onder mal-kander. Want mi ka gie na jender een Ex-empel, dat jender sal doe, glik as mi ka doe na jender. Voorwaar, voorwaar, mi see na jender : Die Dienst-Knecht no ben meer groot as si Heere, ook die Apostel no ben meer groot as diejeen, die ka stier em. As jender weet deese Dingen, salig jender ben, as jender doe die. Mi no spreek van jender allemaal ; mi weet, welke mi ka kies ut ; maar voor dat die Skrift sal word verwoelt : Em die jeet die Brood met mi, die trap mi met Voeten. Noe mi see die na jender, eer-

der, die geskied, voor dat, wanneer die ka geskied, jender kan gloof, dat mi ben die. Voorwaar, voorwaar, mi see na jender : Wie neem op diejeen, die mi sal stier, die neem mi op ; en wie neem mi op, die neem Em op, die ka stier mi.

Toen Jesus a ka see deese Dingen, soo Em a kom bedroefd in die Geest, en a getug en a see : Voorwaar, voorwaar, mi see na jender : Een van jender sal verraad mi. Dan die Jungers a kik een na die ander, en sender a kom bang, van wie Em a spreek. En een a wees onder si Jungers, die a set na Tafel, na die Borst van Jesus, die Jesus a hab lief. Na em Simon Petrus a gie een Wink, dat em a sal vraag, wie die a wees, van die Jesus spreek ! Dieselvde a lee em dan meer destby na die Borst van Jesus, en a see na Em : Heere, wie die ben ! Jesus a antwoord : Deese em ben, na die mi gie die Stuk, die mi dup in. En Kim a dup die Stuk in, en a gie die na Judas Iscarioth, Simon si Soon. En aster die Stuk die Satan a vaar nabinne em. Dan Jesus a see na em : Wat joe doe, doe die met Haast. Maar niemand na die Tafel a weet, voor wat Jesus a see die na em. Som van sender a dink, derwil Judas a hab die Beersch, dat Jesus a see na em : Koop, wat ons hab noodig op die Feest ; of,

dat em a sal gie wat na die Pover sender.
Toen em a ka neem noe die Stuk, soo em a
loop aanstonds nabuten. En die a wees
Nacht toen em a loop wee.

§ 105

Matt. 26 : 14—16. Marc. 14 : 10, 11. Luc. 22 : 4—6.

En em a loop hen na die Hoogpriesters,
en na die Hoofdman, en a spreek met sen-
der, hoosoo em a will overleever Jesus na sen-
der, eh a see : Wat jender will gie mi ? mi
will verraad Em na jender. Toen sender a
hoor die, soo sender a kom bli, en a offerer
na em dertig Silverlingen. En em a acoot-
deer met sender ; en van die Tid af em a soek
Gelegenheid vor verraad Jesus sonder opreer.

§ 106.

Die Geschiednis van die Dondersdag.

Matt. 26 : 17—19. Marc. 14 : 12—16. Luc. 22 : 7—13.

Maar na die eerste Dag van die Ohge-
skurte Brooden, wanneer die Passa-Lam a
moet word geslacht, da die Jungers a kom na
Jesus, eh a see na Em : Waar Joe will, dat
ons bereid voot Joe, vor jeet die Passa-Lam ?
Eh Em a stier twee van si Jungers, Petrus en
Johannes, eh a see na sender : Loop hen na-

hinne die Stadt, en Kik, wanneer jender kom
nabinne die Stadt, soo een Mensch sal ge-
moed jender, die draag een Kan met Water,
volg em na die Hoes, waar em loop nabinne ;
en waar em loop nabinne, daar jender see na
die Heere van die Hoes : Die Meester lat see na
na joe, Mi Tid ben da, mi will hou die Passa
by joe ; waar die Herberg ben, daar mi kan
jeet die Passa-Lam met mi Jungers ? Eh em
sal wies na jender en groot Soller, die ben
gepleistert, en geprepareert : daar jender
maak die bereid voor ons. En die Jungers
a loop hen, en a kom nabinne die Stadt, eh
a vind die soo, as Em a ka see na sender :
en sender a doe glik as Jesus a ka ordiner
na sender, en a bereid die Passa-Lam.

§ 107.

Joh. 13 : 31—36. 14 : 1—31.

En (toen sender a ka kom weerahn) Jesus
a see : Noe die Mensch si Sooh ben verheer-
likt, en God ben verheerlikt in Em : As God
ben verheerlikt in Em, soo God sal verheer-
lik Em ookal in Em selv, en sal verheerlik
Em aanstonds. Liefse Kindjes, een kort Tyd
nochal mi ben niet jender ; Jender sal soek
mi, en soo as mi see na die Jooden. Na
waar mi loop hen, na daar jender no kan

kom ; soo mi see die noe na jender ookal.
Een nieuw Gebod mi gie na jender, dat jender
hab malkander lief, glik as mi ka hab jender
lief, dat jender ook hab malkander lief. Na
die allemaal Volk sal weet, dat jender ben
mi Jungers, as jender hab Liefde onder
malkander.

Simon Petrus a see na Em : Heere, na
waar Joe loop hen ? Jesus a antwoord em.
Na waar tri loop hen, joe no kan volg mi noe,
maar asteran joe sal volg mi. Petrus a see
na Em : Heere. Voorwaartom mi no kan
volg Joe noe ? mi will latstaan mi Leev voor
Joe. Jesus a antwoord em : Joe sal latstaan
joe Leev voor mi ? Voorwaart, voorwaart, mi
see na joe : Die Hahn no sal kraay, tee joe
ka verloochoen mi driemaal.

No lat jender Hert verskrik. As jender
gloof na God, soo jender gloof ook na mi.
Nabinne die Hoes van mi Vader ben veel
Wooningen. As die no a wees soo, doch
mi a sal see na jender ; Mi loop hen, vor be-
reid een Plaats voor jender. En wanneer
mi ka loop hen, en ka bereid een Plaats voor
jender, mi will kom weetaan, en neem jender
na mi, voor dat jender ben, waar mi ben.
En na waar mi loop hen, die jender weet, en
jender weet die Pad ookal.

Thomas a see na Em : Heere, ons no weet,

na waar joe loop hen ; en hoesso ons kan
weet die Pad ? Jesus a see na em : Mi ben
die Pad, en die Waarheid, en die Leev ; nie-
mand kom na die Vader as door mi. As
jender a sal ken mi, soo jender a sal ken
ook mi Vader. En van noe af jender ken
Em en ka kik Em. Philippus a see na Em :
Heere, wies ons die Vader, soo die ben ge-
noeg voor ons. Jesus a see na em : Soo
lang Tid mi ben met jender, en joe no ken
mi Philippus ? Wie kik mi, die kik die
Vader ; hoesso joe see dan : Wies ons die
Vader ? Joe gloof dan niet, dat mi ben in
die Vader, en die Vader ben in mi ? Die
Woorden, die mi spreek na jender, die mi
no spreek van mi selv ; maar die Vader, die
woon nabinne mi, Em doe die Werken.
Gloof mi, dat mi ben in die Vader, en dat die
Vader ben in mi ; as niet, soo gloof mi doch
om die will van die Werken. Voorwaart,
voorwaart, mi see na jender : Wie gloof na
mi, die sal doe die Werken ookal, die mi
doe, en sal doe meer groot Werken, as
deese ; want mi loop na die Vader. En wat
jender sal bed in mi Naam, die mi will doe,
voor dat die Vader sal word verheerlikt in die
Soon. As jender sal begeer eenigste Ding
in mi Naam, mi will doe die.

As jender hab mi lief, soo hou mi Gebode ?.

En mi will bed die Vader, en Em sal gie na jender een ander Trooster, dat Em sal bliev by jender in Eewigheid; naamlik die Geest van Waarheid, die die Werld no kin ontvang: want die Werld no kik Em, en no ken Em; maar jender ken Em, want Em bliev by jender, en sal wees habinne jender. Mi no will lat jender bliev Weesen-Kinders; mi kom weeraan na jender. Die ben nochal een kleen Tid, dat die Werld no sal kik mi meer, maar *jender* sal kik mi; want *mi* leev, en jender sal leev bokal. Na dieselvde Dag jender sal weet, dat mi ben in mi Vader, en jender in mi, en mi in jender. Wie hab mi Geboden, en hou sender, die ben em, die hab mi lief; en wie hab mi lief, die sal word geliefd van mi Vader, en mi will hab em lief, en will openbaar mi selv na em.

Dan Judas, niet die Iscarioth, a see na Em; Heere, wat die ben, dat Joe will openbaar Joe selv na ons, en niet na die Werld? Jesus a antwoord en a see na em: Wie hab mi lief die hou mi Woord, en mi Vader sal hab em lief, en ons sal kom na Em en maak Wooning by Em. Maar wie no hab mi lief, die no hou mi Woorden; en die Woord, die jender hoor, die no ben van mi, maar van die Vader, die ka stier mi. Deese Dingen mi ka spreek na jender, die Tid mi ka wees

met jender. Maar die Trooster, die heilig Geest, die mi Vader sal stier in mi naam, dieselvde sal leer jender alle Dingen, en breng na jender Gedachtis allemaal, wat mi ka see na jender.

Vrede mi lat na jender, mi Vrede mi gie na jender: Mi no gie na jender soo as die Werld gie. No lat jender Hert verskrik en kom na Vrees. Jender ka hoor, dat mi ka see na jender: Mi loop hen, en kom na jender weeraan. As jender a sal hab mi lief, soo jender a sal wees bli, dat mi ka see: Mi loop na die Vader, want die Vader ben meer groot as mi. En noe mi ka see die na jender, bevoor die geskied, voor dat, wanneer die sal geskied, jender kan gloof.

Verder mi no sal spreek veel met jender; want die Vorst van deese Werld kom, en hab nietmetal na mi. Maar voor dat die Werld sal weet, dat mi hab die Vader lief, en dat mi doe, glik as die Vader ka gie een Gebod na mi, soo staan op, en lat ons loop wee van hiesoo.

§ 108.

Mat. 26: 20-29. Marc. 14: 17-25. Luc. 22: 14-23.

En na die Avend Em a kom met die Twaalf [nabinne die Hoers.] En toen die Ur

a kom [vor jeet die Passa-Lam,] Em a set neer, en die twalf Apostels met Em. En Em a see na sender: Mi ka hab een hertik Verjang, vor jeet deese Passa-Lam met jender, bevoor mi leid. Want mi see na jender, dat verder mi no sal jeet meer van die, tee die kom vervoelt nabinne die Koningrik van God. En Em a neem die Drink-Beeker, a dank en a see: Neem dieselvde, en deel die onder jender. Want mi see nu jender, mi no sal drink van die Wienboom si Vrucht, tee die Koningrik van God kom. En toen sender a set en jeet, soo Jesus a see: Voorwaar, mi see na jender, een van jender die jeet met mi, sal verraad mi. Kik, die Hand van mi Verrader ben met mi over die Tafel. En sender a begin vor vraag onder malkander selv, welk van sender die a wees doch, die a sal doe die. En sender a kom goe bedroefd, en a see na Em, een aster die ander: Heere, Mi ben die? en die ander: Mi ben die? En Em a antwoord, en a see na sender, Die ben een van die Twalf, die dup met mi nabinne die Skötel dieselvde sal verraad mi. Die Mensch si Soon loop wel hen, glik as die ben beslooten, en staan geskreeven van Em; doch ongelukkig ben die Mensch, door die die Mensch si Soon word verraden. Die a sal wees beeter vor dieselvde Mensch, as

em nooit a sal wees gebooren. Dan Judas die a verraad Em, a antwoord en a see: Mi ben die dan, Rabbi? Jesus a see na em: Joe see die.

En toen sender a jeet, da Jesus a neem die Brood, a dank, en a breek die, en a gie die na si Jungers, en a see: Neem en jeet, die ben mi Lichaam, die word gegeven voor jender; doe die tot mi Gedachtis. Glik soo Em a neem ook die Drink-Beeker aster die Avendmaal, en a dank, en a gie die na sender, en a see: Jender allemaal drink ut van die: Die ben mi Bloed, die Bloed van die nieuwe Testament, die word vergooten voor jender, en voor moeschi, tot Vergeving van Sondo; (Doe die, soo dikwiis jender drink die, tot mi Gedachtis. 1. Cor. 2.) Voorwaar, mi see na jender: Van noe af mi no sal drink meer van deese Vrucht van die Wienboom, tee na die Dag, wanneer mi sal drink die nieuw met jender nabinne die Koningrik van mi Vader.

§ 109.

Luc. 23: 24-35.

En daar ook een Disput a kom op onder sender, welk van sender a sal word gerekend

voor die Grootste? En Em a see na sender: Die Koningen van die Werld regeer, en sender, die hab Geweld, word genaamt, gnadige Heeren. Doch jender niet soo: Maar die Grootste onder jender sal wees, glik die Jongste, en die Voorganger glik as een Dienaar. Want wie ben die Grootste, em, die set na Tafel, of em, die dien? Ben die niet soo, em die set na Tafel? Maar mi ben onder jender glik as een Dienaar. Jender ben die, die ka hou ut met mi na mi Versoe kinden. En mi will verordineer na jender die Koningrik, glik as die Vader ka verordineer die na mi; dat jender sal jeet en drink na mi Tafel, nabinne mi Koningrik, en set op Troonen, en oordeel die twalf Geslachten van Israel.

En, die Heere a see; Simon, Simon, kik, die Satan ka begeer jender, vor siff jender, glik as die Weit. Maar mi ka bed voor joe, dat joe Gloof no sal hou op, en wanneer joe eenst sal wees bekeert, soo versterk joe Broeders. Simon a see na Em: Heere, mi ben bereid, vor loop met Joe nabinne die Gengangnis en na die Dood. Maar Jesus a see: Petrus, mi see na joe, die Haan no sal kraay van Dag, bevoor joe ka verloochen driemaal, dat joe ken mi.

En Em a see na sender: Wanneer mi ka

sther jender sonder Beersch, sonder Sak en sonder Skoeh, jender ka hab dan oit Mankerment? Sender a see: Noit niet een. Dan Em a see na sender: Maar noe, wie hab een Beersch, em neem die, glik soo ock die Sak. En wie no hab, die verkoop si Kleed, en koop een Sweerd. Want mi see na jender: ook die moet word vollend na mi, die staan geskreeven: Em ben gerekend onder die Quatdoeners: want die Dingen wat ben geskreeven van mi, die hab een End. En sender a see: Heere, kik, hier ben twee Sweerden. En Em a see na sender, die ben gehoeg.

§ 110.

Mat. 26: 30. Marc. 14: 28. Joh. 13: 16, 17.

En toen sender a ka sing die Looft-Psalms; Jesus a see: Mi ben die waare Wienboom, en mi Vader ben die Wiengartman, Elkkeen Rank na mi, die no draag Vrucht, die Em sal neem wees; en eikkeen, die draag Vrucht, die Em sal skoön, dat die draag meer Vrucht. Jender ben skoön noe, om die will van die Woord, die thi ka spreek na jender. Blied nabinne mi, en mi nabinne jender. Glik as die Rank no kan draag Vrucht van si selv,

sonder dat die bliev na die Wienboom, sou ook jender niet, sonder dat jender bliev in mi. Mi ben die Wienboom, jender ben die Ranken. Wie bliev nabinne mi, en mi nabinne em, die draag moeschi Vrucht; want sonder mi, jender kan doe nietmetal. Wie no bliev nabinne mi, die word butten gegooyt, glik as een Rank, en kcm droog, en Volk vergaader soo drooge Ranken, en gooy sender nabinne die Vuur, en bran die op. As jender bliev nabinne mi, en mi Woorden bliev nabinne jender, soo jender sal bed, wat jender will, en die sal geskied na jender. Na die mi Vader word verheerlikt, dat jender draag moeschi Vrucht, en soo jender sal wees mi Jungers. Glik as mi Vader hab mi lief, soo mi hab jender lief ookal. Blied in mi Liefde. As jender hou mi Geboden, soo jender bliev in mi Liefde, glik as mi hou die Geboden van mi Vader, en bliev in si Liefde.

Deese Dingen mi ka spreek na jender, voor dat mi Bliskap bliev nabinne jender, en dat jender Bliskap word volkomm. Deese ben mi Gebod, dat jender sal hab malkander lief, glik as mi hab jender lief. Niemand hab meer groot Liefde, as deese, dat eth lee si Leev daar voor si Vrienden. Jender ben thi Vrienden, as jender doe, wat mi gebied na jender. Mi no see verder meer, dat jender

ben Dienst-Knechten, want een Dienst-Knecht no weet, wat si Heere doe. Maar na jender mi ka see, dat jender ben Vrienden, want all wat mi ka hoor van mi Vader, die mi ka maak bekent na jender. Jender no ka kies *mi* ut, maar mi ka kies *jender* ut, en ka ordineer jender, dat jender sal loop hen, en breng Vrucht, en dat jender Vrucht sal bliev; voor dat, as jender sal bed die Vader in mi Naam, Em gie die na jender. Deese mi gebied na jender, dat jender sal hab malkander lief. As die World, haat jender, soo weet, dat dieselvede, ka haat mi eerder as jender. As jender a wees van die World, soo die World a sal, hab si Eigen lief; maar derwil jender, no ben van die World, maar mi ka kies jender, ut van die World, voordarom die World, haat jender. Dink na mi Woord, die mi ka see na jender: Die Dienst-Knecht no ben meer groot as si Heere. As sender ka vervolg, *mi* soo sender sal vervolg *jender* ookal; as sender ka hou *mi* Woord, soo sender sal hou die Woord van jender ookal. Maar allemaal die sender sal doe na jender, om die will van mi Naam; want sender no ken Em, die ka stier mi. As mi no a ka kom, en ka see die na sender, soo sender no a sal hab Sondo; maar noe sender hab niet-metal vor excuseer sender Sondo. Wie haat

mi, die haat mi Vader ookal. As mi no a ka doe die Werken onder sender, die niet een ander ka doe, soo sender no a sal hab Sondo; maar hoe sender a kik die, en haat doch soo wel mi, as mi Vader. Maar die Woord moet kom verwoelt die staan geskreven in sender Wet: Sender haat mi sonder Oorsak. Maar wanneer die Trooster sal kom, die mi sal stier na jender van die Vader, die Geest van Waarheid, die loop ut van die Vader, die sal getug van mi. En jender sal getug ookal, want jender a wees niet mi van die Begin.

Deese Dingen mi ka spreek na jender, voor dat jender no word geergert. Sender sal gooy jender ut van die Synagogen; ja die Tid kom, dat elkeen, die maak jender doed, sal dink, em doe een Dienst na God met die. En sender sal dee deese Dingen na jender voordarom, dat sender no ken mi Vader, en ook niet mi. Maar mi ka spreek deese Dingen na jender, voor dat, wanneer die Tid sal kom, jender kan dink op die, dat mi ka see die na jender. Doch deese Dingen mi no ka see jender van die Begin, want mi a wees met jender. En noe mi loop hen na Em, die ka stier mi, en niemand van jender vraag mi: Na waar Joe loop hen? Maar derwil mi ka see deese Woorden na jender, soo jender Hert ka kom voll van Droefnis. Doch mi see

na jender die Waarheid, die ben profitabel voor jender, dat mi loop hen; want as mi no loop hen, soo die Trooster no sal kom na jender; maar as mi loop hen, soo mi will stier Em na jender. En wanneer dieselvde kom, soo Em sal overtug die Welt van die Sondo, en van die Gerechtigheid, en van die Ordeel. Van die Sondo, dat sender no gloof na mi. Van die Gerechtigheid, dat mi loop na die Vader, en jender no sal kik mi meer. Van die Ordeel, dat die. Vorst van deese Welt geoordeelt ben. Mi hab veel Dingen nochal vor see na jender; maar jender no kan draug die noe. Maar wanneer Em, die Geest van Waarheid, sal kom, Em sal ley jender na alle maal Waarheid. Want Em no sal spreek van Em selv; maar wat Em sal hoor, die Em sal spreek, en wat ben vor kom, die Em sal maak bekent na jender. Dieselvde sal verheerlik mi, want Em sal neem die van mi, en sal verkondig die na jender. All wat die Vader hab, die ben van mi, voordarom mi ka see: Em sal neem die van mi, en verkondig die na jender.

Over een kleen Tid, soo jender no sal kik mi, en weeraan over een kleen Tid, soo jender sal kik mi; want mi loop na die Vader. Dan som van si Jungers a see onder malkan-der; Wat die ben, dat Em a see na ons:

Over een kleen Tid, soo jender ho sal kik mi em weeraan over een kleen Tid, soo jender sal kik mi; en: Want mi loop na die Vader! Da sender a see: Wat die ben, die Em see: Over een kleen Tid! Ons no weet, wat Em spreek. Noe Jesus a bemerk, dat sender, a will vrag Em, en a see na sender: Van die jender vrag onder malkander, dat mi ka see: Over een kleen Tid, soo jender no sal kik mi, on weeraan over een kleen Tid, soo jender sal kik mi: Voorwaar, voorwaar, mi see na jender, dat jender sal traan en lamenteer, maar die World sal wees bli; jender sal wees bedroefd, doch jender Bedroefnis sal word verandert na Biskap.

Een Vrouw, wanneer em baar, soo em hab Droefnis, want si Uur ka kom: maar want neer em ka baar die Kind, soo em no dink meer na die Benuwtheid, om die will van die Biskap, dat een Mensch ben geboorten na die World. En noe jender hab Droefnis ookal; maar mi will kik jender weeraan, en jender Hert sal kom bli, en niemand sal neem jender Biskap van jender. En na dieselvde Dag jender sal vrag mi nietmetal. Voorwaar, voorwaar, mi see na jender: As jender sal bed die Vader voor een Goed in mi Naam, soo Em sal gie die na jender. Tee noe, jender ka bed nietmetal in mi Naam. Bed, soo

jender sal ontvang, dat jender Biskap kan wees vollkom.

Deese Dingen mi ka see na jender door Gliknissen; maar die Tid kom, dat mi no sal spreek meer met jender door Gliknissen, maar mi sal verkondig na jender vrie ut van mi Vader. Na dieselvde Dag jender sal bed in mi Naam; en mi no see na jender, dat mi will bed die Vader voor jender, Want Em selv, die Vader, hab jender lief, voordaarom dat jender hab mi lief, en gloof dat mi ka loop ut van God. Mi ka loop ut van die Vader, en ka kom na die World: Weeraan mi verlaat die World, en loop na die Vader. Si Jungers a see na Em: Kik, noe Joe spreek vrie ut, en no see een Gliknis. Noe ons ben verseekert, dat Joe weet alle Dingen, en Joe no hab noodig, dat jemand vrag Joe. Voordaarom ons gloof, dat Joe ka loop ut van God. Jesus a antwoord na sender: Noe jender gloof. Kik die Uur kom, en die ka kom alreeds, dat jender sal word verstrooit, elkeen na si Eigen, en sal latstaan mi alleen; maar mi no ben alleen, want die Vader ben met mi. Deese Dingen mi ka spreek na jender, dat jender hab Vrede in mi. In die World jender hab Bangheid; maar hab goeje Moed; Mi ka overwin die World.

Deese Worden Jesus a spreek, en a lecht-

op si Oogen na die Hemel, en a sce : Vader, die Uur ka kom ; verheerlik Joe Soom, voor dat Joe Soom verheerlik Joe ookal. Glik as Joe ka gie na Em Macht over allemaal vleesch, dat Em gie die ewig Leev na sender allemaal, die Joe ka gie na Em. En deese ben die ewig Leev, dat sender ken Joe, die Joe ben die waarachtige God, en Jesus Christus, die Joe ka stier. Mi ka verheerlik Joe op die Aarde, en ka vollendig die Werk, die Joe ka gie na mi, dat mi a sal doe die. En noe, O Vader ! verheerlik mi by Joe selv, met die Heerlikheid, die mi a hab by Joe, bevoor die World a wees. Mi ka openbaar Joe Naam na die Menschen die Joe ka gie na mi ut van die World. Sender a wees van Joe, en Joe ka gie sender na mi, en sender ka behou Joe Woord. Noe, sender weet, dat all wat Joe ka gie na mi, ben van Joe. Want die Woorden, die Joe ka gie na mi, die mi ka gie na sender, en sender ka neem die aan, en ka erken waarachtig, dat mi ka loop ut van Joe, en sender gloof dat Joe ka stier mi.

Mi bed voor sender, en mi no bed voor die World, maar voor sender, die Joe ka gie na mi ; want sender ben van Joe : En allemaal, wat ben van mi, die ben van Joe, en wat ben van Joe, die ben van mi ; en mi ben verheerlikt nabinne sender. En mi no ben

meer nabinne die World ; maar sender ben nabinne die World, en mi kom na Joe. Heilige Vader, bewaar sender in Joe Naam, die Joe ka gie na mi, dat sender ben Eens, glik as ons.

Soo lang mi a wees nabinne die World met sender, mi ka bewaar sender in Joe Naam. Die Joe ka gie na mi, die mi ka bewaar, en niet een van sender ben verlooren, sonder die verlooren Kind, voor dat die Skrift a sal kom verwoelt. Maar noe mi kom na Joe, en mi spreek die nabinne die World, dat sender hab mi Blikskap vollkom nabinne sender. Mi ka gie na sender Joe Woord, en die World haat sender ; want sender no ben van die World, glik as ook mi no ben van die World. Mi no bed, dat Joe sal neem sender wee van die World, maar dat Joe sal bewaar sender van die Quaat. Sender no ben van die World, glik as ook mi no ben van die World. Heilig sender in Joe Waarheid : Joe Woord ben die Waarheid. Glik as Joe ka stier mi na die World, soo mi stier sender ook na die World. Mi heilig mi selv voor sender, dat sender ookal kan wees geheilig in Waarheid.

En mi no bed voor deese alleen, maar voor sender ookal, die door sender Woord sal ploof na mi ; Voor dat sender allemaal sal wees

Een; glik as joe Vader in mi, en mi in Joe, dat sender sal wees Een in ons ookal, voor dat die Werld kan gloof, dat Joe ka stier mi. En mi ka gie na sender die Heerlikheid, die Joe ka gie na mi, dat sender sal wees Een, glik as ons ben Een. Mi nabinne sender, en Joe nabinne mi, voor dat sender sal wees vollkom in Een, en dat die Werld kan weet, dat Joe ka stier mi, en dat Joe hab sender lief, glik as Joe hab mi lief. Vader, my will, dat waar mi ben, sender ook sal wees by mi, die Joe ka gie na mi; dat sender kan kik mi Heerlikheid, die Joe ka gie na mi; want Joe ka hab mi lief, bevoor die Fondament van die Werld ka lee.

Rechveerdige Vader, die Werld no ken Joe; maar mi ken Joe, en deese ka erken, dat Joe ka stier mi. En mi ka maak Joe Naam bekend na sender, en will maak die bekent; voor dat die Liefde, met die Joe hab mi lief, kan wees nabinne sender, en mi nabinne sender.

§ 111.

Matt. 20 : 30—35. Marc. 14 : 26—31. Luc. 22 : 39. Joh. 18 : 1.

Toen Jesus a ka spreek deese Worden, soo Em a loop ut van die Stadt, over die Wa-

ter-Goot Kidron; en Em a loop, soo as si Geweente a wees, na die Olieberg; en si Jungers a volg Em na dieselvde Plaats. En Jesus a see na sender: Na deese Nacht jender allemaal sal erger jender na mi. Want die staan geskreven: Mi sal slaa die Herder, en die Skapen van die Kudde sal verstrooy sender. Maar wanneer mi ka stann op, soo mi will loop bevoor jender na Galilea.

Maar Petrus a antwoord, en a see na Em: As ook sender allemaal sal erger sender na Joe, soo doch mi nooit will erger mi. Jesus a see na Em: Voorwaar, mi see na joe: Na deese Nacht, eerder die Haan kraay, joe sal verloochen mi driemaal. Maar em a spreek noch verder: Ja, as mi ook sal moet dood met Joe, soo mi doch no will verloochen Joe. Even dieselvde allemaal Jungers a see ookal.

§ 112.

Matt. 26 : 36—45. Marc. 14 : 32—42. Luc. 22 : 40—46. Joh. 18 : 1, 2.

Dan Jesus a kom met sender na een Plaats, genaamt Gethsemane, daar a wees een Hofje, na die Em a loop, en si Jungers. Maar Judas, die a verraad Em, a weet die Plaats ookal: want Jesus a vergader Em daar dikwils met si Jungers. Em toen Em a kom daar, Em a

see na sender : Set neer hiesoo, tee dat mi loop hen, na ginter en bed. En Em a neem met Em Petrus, en Jacobus, en Johannes, die twee Soons van Zebedens, en a begin vorwees bedroefd, en a beev, en vor wees benauwt. Dan Jesus a see na sender : Mi Siel, ben bedroefd tee na die Dood ; bliev hiesoo, en wach met mi. En Em a skeyd Em af van sender, omtrent soo ver, as Volk kan gooy met een Steen, en a vall na knie, met si Aangesicht na Grond, en a bed, dat as die a sal wees mooglik. die Ur a kan passeer voorby ; En a see : Abba, o mi Vader ! as die ben mooglik, (en alle Dingen ben mooglik na Joe,) soo neem deese Drink-Beeker wee van mi ; doch niet soo as *mi* will, maar *Joe* Will geskied.

En Em a.kom, en a vind sender na Slaap, en a see na Petrus : Simon, joe slaap dan ? jender kan wach dan niet een Ur met mi. Wach en bed dat jender no vall na Versoeking ; die Geest ben wel gewillig, maar die Vleesch ben swak. En Em a loop hen die tweedemaal, en a bed, en a see : Mi Vader ! as die no ben mooglik, dat deese Drink-Beeker kan passeer van mi, sonder dat mi drink die, soo Joe Will geskied. En Em a kom weeraan, en a vind sender weeraan na Slaap, want sender Oogen a wees voll van Slaap ; en sender

no a weet, wat sender a antwoord Em. En Em a lastaan sender, en a loop hen weeraan, en a bed die dertemaal, en a see dieselwde Woorden. Maar een Engel van die Hemel a verskien na Em, en a versterk Em.

En die a kom met Em na een swaare Dood-Strie, en Em a bed meer ernstig, (met een sterk Geroep en Traanen. Heb. 5 : 7.) En si Sweet a wees glik groote Bloed-Drupjes, die a vall heer na die Grond. En Em a staan op van die Gebed, en a kom na si Jingers die dertemaal, en a vind sender na Slaap van Droefheid, en a see na sender : Wat jender slaap dan en rust ? Die ben genoeg ! Staan op en bed, dat jender no vall na Versoeking. Kik, die Ur ka.kom, dat die Mensch si Soon word overgeleveert na die Handen van die Sondaars. Staan op, lat ons loop ; kik, em, die verraad mi, ben desibby.

§ 113.

Mat. 26 : 47—56. Marc. 14 : 43—52. Luc. 22 : 47—54. Joh. 18 : 3—12.

En aanstands, toen Em a spreek nochal, kik, da Judas a kom, een van die Twalf, en met em een groot Hoop, met Sweerden en lange Stokken ; en a hab met em die Bende Soldaten, en die Dienaars van die Hoog-

priesters, Skrifgeleerden, en Phariseen, met Vlamboes, Lampen en Geweer. Jesus noe, die a weet, all wat a sal, geskied met Em, a loop nabuten (van die Hofje) en a see na sender : Wie jender soek dan ? Sender a antwoord Em : Jesus van Nazareth. Jesus a see na sender : *Mi* ben die. Maar Judas, die a verraad Em, a staan daar met sender ookal. Toen noe Jesus a see na sender : *Mi* ben die ! soo sender a draai asterut, en a vall na grond. Dan Em a vraag sender weeraan : Wie jender soek dan ? Sender a see : Jesus van Nazareth. Jesus a antwoord : *Mi* ka see na jender, dat *mi* ben die ; as jender soek dan *mi*, soo lat deese loop hen. Voor dat die Woord a sal kom verwoell, die Em a see : *Mi* ka verloor niet een van sender, die Joe ka gie na *mi*. En die Verrader a ka gie een Teeken na sender, en ka see : Dieselvde, die *mi* sal kuss, Em ben die ; vass Em, en ley Em sekerlik wees. En aanstonds em a staan na Jesus, en a see ; Wees gegroet, Rabbi, Rabbi ! en a kuss Em. Maar Jesus a see na em ; *Mi* Vriend, voorwaaram joe ka kom ? Judas joe verraad die Mensch si Soon met een Kuss ? Dan sender a kom, en a lee sender Handen na Jesus, en a vass Em.

Maar toen sender, die a wees by Em, a kikk, wat a sal geskied, soo sender a see na Em :

Heere ons sal slaa dan met die Sweerd ! En kikk, een van sender, die a wees met Jesus, Simon Petrus a hab een Sweerd, em a strek ut si Hand, en a trek die ut, en a slaa na die Dienst-Knecht van die Hoogpriester, en a kap em si rechter Oor af. En die Dienst-Knecht si Naam a wees Malchus.

Maar Jesus a antwoord en a see : Lat sender doe doch soo ver. En Em a raak na, si Oor, en a genees em. Dan em a see na Petrus : Stek joe Sweerd nabinne die Skeed : want wie neem die Sweerd, die sal bederv door die Sweerd. Of joe dink dan, dat *mi* no a sal kan bed *mi* Vader, dat Em a sal stier na *mi* meer as twalf Legionen van Engels ! *Mi* no sal drink dan die Drink-Beeker, die *mi* Vader ka gie na *mi* ! Hoosoo dan die Skriff a sal word verwoell ! Die moet geskied soo.

Na dieselvde Ur Jesus a see na die Hoogpriesters, en na die Hoofdman van die Tempel, en na die Ouderlingen, en die Volk die a kom tegen Em ; Jender ka kom ut, as tegen een Moordenaar, met Sweerden en met lange Stokken, vor vass, *mi* : En doch *mi* ka wees daglik met jender nabinne die Tempel, en ka leer, en jender no ka lee een Hand na *mi*. Maar deese ben jender Ur, en die Macht van Dusteris. En all deese Dingen ka geskied, dat die Skriften van die Propheeten a sal kom

vorvoellit. Dan allemaal Jungers a verlaat Em, en a vlucht. En daar a wees een Jongeling, die a volg Em, die a hab een LinnenKleed na si bloot Lif, en die Jongling senders a vass em. Maar em a latstaan die Linnen, en a vlucht naakt van sender.

§ 114.

Matt. 26: 67—68. Marc. 14: 53—65. Luc. 22: 54, 56, 63—65.
Joh. 18: 12—24.

Dan die Bende (van Soldaten) en die Over-Captain, en die Dienaars van die Jooden a neem Jesus, en a bind Em, en a ley Em vooreerst na Hannas, die a wees die Vader van Caiphas si Wif, en die a wees Hoogpriester dieselvde Jaar. Caiphas noe a wees dieselvde, die a ka gie die Raad na die Jooden, dat die a wees beeter, dat een Mensch a sal dood voor die Volk. En Hannas a stier Em gebonden na die Hoogpriester Caiphas, na waar die Skrifgeleerden en Ouderlingen a wees vergadert.

En Simon Petrus a volg Jesus van ver, en een ander Junger. Dieselvde Junger a wees bekend na die Hoogpriester, en a loop met Jesus nabinne die Palee van die Hoogpriester; maar Petrus a staan nabuiten voor die Door. Dan die ander Junger, die a wees

bekent na die Hoogpriester, a loop nabuiten, en a spreek met die Door-Wachterin, en a breng Petrus nabinne. En die Dienaars en Officiers a ka stek op een Vuur na middel van die Palee, en a set sender malkander, en a warm sender; (want die a wees koud ;) En Petrus a set em onder sender, dat em a kan kik, wat voor een End die a sal neem, en a warm em selv by die Vuur.

En die Hoogpriester a vraag Jesus van si Jungers en van si Leering. Jesus a antwoord em: Mi ka spreek vrie orentlik navoor die Werld. Mi ka leer altid nabinne die Skoel, en nabinne die Tempel, waar allemaal Jooden kom malkander, en mi ka spreek niemetal in verborgen. Voor wat joe vraag mi voor die? Vraag sender, die ka hoor wat mi ka see na sender; kik sender weet wat mi ka see. En toen Em a spreek deese Woorden, soo een van die Dienaars, die a staan daarsoo, a gie na Jesus een Kinnebak-Slaa, en a see: Joe a sal gie dan soo een Antwoord na die Hoogpriester? Jesus a antwoord: As mi ka spreek quaalik, soo bewies die, dat die ben quaat; maar as mi ka spreek wel, voor wat joe slaa mi dan?

Maar die Hoogpriesters en die Ouderlingen, en die geheele Raad a soek valsch Getugnis tegen Jesus, voor dat sender a kan

maak Em dood; en sender a vind nietmetal. En maski veel valsche Getugens a kom, en a gie valsch Getugnis tegen Em; doch sender a vind niet een: want sender Getugnis no a accordeer. Op laatst twee valsche Getugens a kom daar, en a see: ons ka hoor, dat Em a see: Mi will breek af die Tempel van God, die ben gemakt met Handen en na drie Dagen mi will bouw een ander, die no ben gemakt met Handen. Maar sender Getugnis no a accordeer nochal. En die Hoogpriester a staan op na middel van sender, en a vrag Jesus, en a see: Joe antwoord dan nietmetal op die, wat deese Getug tegen Joe? Maar Jesus a swieg still, en a gie niet een antwoord. Dan die Hoogpriester a vrag Em weeraan, en a see na Em: Mi besweer Joe by dié leevendig God, dat Joe see na ons, as Joe ben Christus, die Soon van God die Hoogge- loofde? Jesus a see, joe see die: Mi ben die. En mi see na jender: Van noe af jender sal kik die Mensch si Soon set na die rechter Hand van die Kracht, en kom in die Wolken van die Hemel. Da die Hoogpriester a verskut si Kleeren en a see: Em a spreek Lastering tegen God, wat Getugnis ons hab verder noodig? Kik, noe jender ka hoor si Gods-Lastering. Wat jender dink? Maar sender allemaal a verdoem Em, en a see:

Em ben skuldig vor dood. Da sender a spug ut na si Aangesicht, en a slaa Em met Vuisten. En die Mains, die a hou Jesus gevangen, a bespot Em, en a toe si Aangesicht, en a slaa Em na die, en a vrag Em, en a see: Prophecey na ons, Joe, Christus, wie die ben, die a slaa Joe. En veel ander Lasteringen sender a praat tegen Em. En die Dienst-Knechten a slaa Em na si Aangesicht.

§ 115.

Matt. 26: 69—75. Marc. 14, 66—72. Luc. 22: 56—62. Joh. 18: 17, 25—27.

Maar Petrus, a staan nabuten voor die Door, da een Dienst-Meid van die Hoogpriester a kom, die a passop die Door; En toen em a kik Petrus set by die Vuur, vor warm em, dieselvde a kik met een sterk Oogo na em, en a see: Deese a wees met Em ookal. En na Petrus em a see: Joe ben dan niet ook een van deese Mensch si Jungers? Joe a wees ja ook met die Jesus van Galilea. Maar em a loochen navoor sender allemaal, en a see: Vrouw mi no ken Em, mi no weet wat joe see. En em a loop nabuten, en a passeer die Door, da dieseivde Dienst-Meid, en noch een ander, a kik em, en a see na sender, die a wees daar: Deese ben een van sender, die a wees met die Jesus

van Nazareth. Soo sender a see na em :
 Joe ben dan niet een van si Jungers ! En ein
 a loochen weeran, en a sweer op die : Mi no
 ken die Mensch. En een weening aster die,
 ontrent een Ur, een van die Hoogpriester si
 Dienst-Knechten, die a wees na Vriendskap
 met diejeen, van die Petrus a kap die Oor af,
 a bekrachtig die, en a see : Voorwaar, deese
 a wees met Em ookal ; want em ben een Ga-
 lileer. En na Petrus em a see : Mi a kik joe
 dan niet met Em nabinne die Hofje ! En
 sender die a staan daar a see na Petrus :
 Voorwaar, joe ben een van sender, want joe
 Mond-Spraak veraad joe. Maar Petrus a
 verlooohen weeraan, en a begin vor vervloek si
 selv, en vor sweer : Mi no ken die Mensch,
 van die jender praat, En aanstonds, toen
 em a praat nochal, die Haan a kraay die
 tweedemaal. En die Heere a keer Em om,
 en a kik na Petrus. En Petrus a dink op die
 Woord van die Heere, die Em a ka see :
 Eerder die Haan kraay tweemaal, soo joe sal
 verlooohen mi driemaal. En Petrus a loop na-
 butten, en a traan bitterlik.

Die Geschiednis van die Vriedag.

Matt. 27 : 1, 2. Marc. 15 : 1. Luc. 22 : 66—71 ; 23 : 1. Joh. 18 : 28.

En aanstonds na vroevroë so gauw die Dag
 a kom, da die Onderlingen van die Volk en
 die Hoogpriesters en Skrifgeleerden a kom
 malkander, en a hou een Raad tegen Jesus,
 dat sender a kan maak Em dood. En sen-
 der a breng Em navoor sender Raad, (vor
 verhoor Em noch eenmaal,) en a see : Joe
 ben dan Christus ! See die na ons. Maar
 Em a see na sender : As mi see die na jen-
 der, soo jender no gloof die. En as mi vraag,
 soo jender no antwoord, en doch jender no
 lat mi los. Voordarom, van noe af die
 Mensch si Soon sal set na die rechter Hand
 van die Kracht van God. Dan sender alle-
 maal a see : Soo Joe ben dan die Soon van
 God ! Em a see na sender : Jender see
 die, want mi ben die. Maar sender a see :
 Wat ons hab verder Getugnis noodig ! Ons
 selv ka hoor die ut van si eigen Mond. En
 die geheele Hoop a staan op, en toen sender
 a ka bind Jesus weeraan, sender a ley Em
 van Caiphaz navoor die Recht-Hoes, en a
 overleveer Em na die Gouverneur Pontius
 Pilatus.

Mat. 27: 3-10.

Toen Judas, die a verraad Em a kik noe, dat Jesus a wees veroordeelt na die Dood, soo die a betrouw em, en em a breng weeraan die dertig Silverlingen na die Hoogpriesters en na die Ouderlingen, en a see: Mi ka doe Quaat, dat mi ka verraad onskuldig Bloed. Sender a see: Wat die raak ons? joe selv moet kik na die. En em a gooy die Silverlingen nabinne die Tempel, en a vertrek, en a loop hen, en a hang si selv; (en ka borst na middel van malkander, en almaal si Dermen ka stort ut. Hand. Apost. 1: 18.) Maar die Hoogpriesters a neem die Silverlingen, en a see: Die no ben recht, dat ons lee sender nabinne die Offer-Kist, want die ben Bloed-Geld. En sender a hou een Raad, en a koop voor die een Stuk Grond van een Pot-Maaker tot een Begravnis-Plaats voor die Vremdelingen. Voordaarom, dieselvde Stuk Grond ben genant die Bloed-Grond tee van Dag. Da die ben verwoell, wat ben gesprooken door die Propheet, die a see: Sender ka neem dertig Silverlingen van die Kinders van Israel, as die Prys van Em, die a word getaxeert, die sender ka taxeer (soo hoog.) En ka gie dieselvde voor een Stuk Grond van een Pot Maaker, soo as die Heere ka gie Order na mi, (vor see.)

Joh. 18: 28-32.

Maar die Jooden selv no a loop nabinne die Recht-Hoes, dat sender ho a sal kom onrein * maar a kan jeet die Passa. Da Pilatus a kom ut na sender, en a see: Wat Klaagte jender breng dan tegen deese Mensch? Sender a antwoord eh a see na em: As deese Mensch no a wees een Quaatdoener, ons no a sal ka overlevee Em na joe. Dan Pilatus a see na sender: Soo jender neem Em dan, en oordeel Em soo as die accordeer met jender Wet.

Die Jooden a see na em: Ons no derv maak een Mensch dood; Soo dat die Woord van Jesus a sal kom verwoell, die Em a see, wat voor een Dood Em a sal sterv.

Mat. 27: 11-14. Marc. 15: 2-5. Luc. 22: 9-12. Joh. 18: 28-36.

En sender a begin, vor verklaag Em, en a see: Ons vind deese Mensch, dat Em verkeer die Volk, en verbied vor gie Skat-Geld na die

* Een Partie van die Jooden a jeet die Passa-Lamm een Dag meer laat, as die ander.

Keysers, en see : Dat Em ben Christus, een Koning. Dan Pilatus a loop weeraan nabinne die Recht-Hoes, en a roep Jesus : En Jesus a staan navoor die Gouverneur; en die Gouverneur a vrang Em, en a see : Joe ben dan die Koning van die Jooden? Jesus h antwoord : Joe see die van job selv, of ander ka see die van mi na joe? Pilatus h antwoord : Mi ben dan eek Jood? Joe eigen Volk en die Hoogpriesters ka overleever Joe na mi; wat Joe ka doe? Jesus h antwoord : Mi Koningrik no ber Van deese Werld; As mi Koningrik a wees van deese Werld, dan mi Dienaars a sal strie voor die, dat mi no a sal word overgelevert na die Jooden. Maar noe mi Koningrik no ben van hier. Dan Pilatus a see na Em : Soo Joe ben dan doch een Koning? Jesus a antwoord : Joe see die, mi ben een Koning; voor die mi beh gebrocht, en ka kottr na die Werld, dat mi sal gie Getugnis na die Waarheid. Wie ut die Waarheid ben, die hoor mi stem. Pilatus a see na Em : Wat ben Waarheid? En toen em h ka see die, sto em a loop weeraan nabuten na die Jooden, en a see na sender : Mi vind niet een Skuld na Em.

En die Hoogpriesters en die Ouderlingen a beskuldig Em hard. Maar Em a antwoord nietmetal. Dan Pilatus a see na Em : Joe antwoord dan nietmetal? Kik, hoe hard sen-

der verklaag Joe! En Em a antwoord niet op een Woord, soo dat ook die Gouverneur a verwonder em goe. Maat sender a hou an, en a see : Em ka beweeg die Volk, met die, dat Em ka leer hier en daar door die geheele Joden, en ka begin van Galilea, en ka kom tje hiesoo.

Toen Pilatus a hoor van Galilea, soo en a vraag, as deese Mensch a wees van Galilea? En soo as em a verstaan, dat Jesus a behoort na onder die Regeering van Herodes, soo Pilatus a sier Em na Herodes, die h wees na dieselvde Dagen nabinne Jerusalem ookal. En toen Herodes h kik Jesus, soo em a kom goe bi; want si Verlang a wees van lang Tid vor kik Em; want em a ka hoor veel van Em, en a hoop, vor kik een Teeken van Em. En Herodes h vrang Em over meening Saaken, maar Jesus a antwoord em nietmetal. En die Hoogpriesters en Skrifgeleerden a staan, en a verklag Em hard. Maar Herodes met si Soldaten a veracht en a bespot Em, h doe Em een blinkend Kleed aan, en a sier Em weeraan na Pilatus. Na dieselvde Dag Pilatus en Herodes a kom Vrienden met malkan der; want toevorn sender a wees na Vyandskap tuschen sender selv.

Matth. 27: 15-23. Marc. 15: 6-14. Luc. 23: 18-23. Joh. 18: 38: 40.

En Pilatus a roep die Hoogpriesters, en die Oversten en die Volk malkander. En a see na sender : Jender ka breng deese Mensch na mi, as een, die keer af die Volk, en kik, mi ka examineer Em navoot jender, en mi no vind na die Mensch niet een van die Saaken, met die jender beskuldig Em. Ja Herodes ook niet : Want mi ka stier jender na em, en kik, niemand ka breng wat op tegen Em, met die Em verdien die Dood. Voordarom mi will straf Em, en lat Em los.

Noe op die Feest die Gouverneur a hab een Geweente, vor gie een Arrestant los na die Volk, die sender a will. En na dieselvde Tid em a hab een Arrestant, een apart bekende bevoor ander, genaamt Barrabas, die a ka word gevangen met die Oproer-Maakets, en die a ka doe een Moord in die Oproer. En die Volk a roep, en a bed, dat em a, sal doe soo, as em a wees geweent. En toen sender a wees malkander, soo Pilatus a see na sender : Wat, voor een jender will, dat mi sal gie los na jender !

Barrabas of Jesus, van die word gesproken dat Em ben Christus ! Jender will dan, dat

mi sal gie die Koning van die Jooden los na jender ? Want em a weet wel dat die Hoogpriesters a ka overleever Em ut Neidigheid.

En toen em a set op die Reent-Stoel, da si Wif a stier na Em, en a lat see na, em : Joe hab nietmetal vor doe met deese Rechtverdige ; want mi ka leid moeschi van Dag in een Droom van wegens Em. Maar die Hoogpriesters en die Onderlingen a overpraat die Volk, dat sender a sal bed voor Barrabas, en a sal maak Jesus dood. Die Gouverneur a antwoord en a see na sender : Welk van die twee jender will, die mi sal gie los na jender ! Da die geheele Meenigte a skrenw en a see : Wee met deese, en gie ons Barrabas los. Da Pilatus a roep na sender weeraan, en a will lat Jesus los, en a see : Wat jender will dan, dat mi sal doe met Jesus, van die word gesproken ; dat Em ben Christus ! Sender allemaal a roep : Kroesig Em, Kroesig Em ! Pilatus a see die dertemaal na sender : Wat Quaat Em ka doe dan ! Mi no vind een Oorsaak van die Dood na Em : voordarom mi will straf Em, en lat Em los. Maar sender a hou aan by em met groot Geskrenw, en a begeer, dat Jesus a sal word gekroesigt. En die Geskrenw van sender, en van die Hoogpriesters a win die Overhand.

§. 121.

Mat. 27: 24-30. Marc. 15: 15-19. Luc. 23: 25. Joh. 19: 12-1

Toen Pilatus a kik noe, dat em a kan doe nietmetal, maar dat die Oproer a kom veel-meer groot, soo em a neem Water, en a wasch die Handen navoor die Volk, en a see: Mi ben onskuldig na die Bloed van deesse Rechtveerdige, jender kan kik na die. Dan die geheele Volk a antwoord en a see: Sie Bloed kom over ons, en over ons Kinders. Soo Pilatus a dink vor doe een Genoeg na die Volk, en a gie na sender Barrabas los, die om die will van een Oproer en Moord a wees gegooyt nabinne die Gevanghis, vóor die sender a bed; maar Jesus em a lat geesel, en a overleever Em, dat Em a sal word gekroesigt.

Dan die Soldaten van die Gouverneur a neem Jesus met sender nabinne die Recht-Hoes, en a roep malkander die geheele Bende over Em, en a trek Em si Kloeren af, en a doe Em een Purpur-Mantel aan. En vlecht een Kroon van Doornen, en a set die op si Hoofd; en a gie Em een Rietstock na si rechter Hand, en a buig sender Knie navoor Em, a bespot Em, en a see: Wees gegroet, Joe Koning van die Jooden! En sender a Spug op Em, a gie Em Kinnebak-Slaa, en a

§. 122.

Joh. 19: 4-15. Luc. 23: 24.

neem die Rietstock, en a slaa si Hoofd met die.

Soo Pilatus a kom ut weeraan, en a see na sender: Kik, mi breng Em ut na jender, dat jender kan weet, dat mi no vind een Skuld na Em. Soo Jesus a kom ut, en a draag een Doornen-Kroon, en een Purpur-Kleed. En Pilatus a see na sender: *Kik welk een Mensch!* Toen die Hoogpriesters en die Dienaars a kik Em, da sender a roep en a see: Kroesig Em, kroesig Em. Pilatus a see na sender: Soo jender neem Em dan hen, en kroesig Em, want mi no vind een Skuld na Em. Die Jooden a antwoord na Em: Ons hab een Wet, en door dieselvde Wet Em moet dood; want Em ka maak Em selv tot die Soon van God. Toen Pilatus a hoor deesse Woord, soo em a kogn meer na Vrees nochal. En em a loop weeraan nabinne die Recht-Hoes en a see na Jesus: Van waar Joe ben? Maar Jesus no a gie Antwoord na em. Pilatus dan a see na Em: Joe spreek dan niet met mi? Joe weet dan niet, dat mi hab Macht vor kroesig Joe, en hab Macht vor

gie Joe los! Jesus a antwoord: Joe no a sel hab Macht over mi, as die no a ka word gegeven na joe van boven af; voordarom em, die ka overlevee mi na joe, hab meer groot Sondo. Van die Tid af Pilatus a soek vor lat Em los: maar die Jooden a roep, en a see: As joe lat deese los, soo joe no ben een Vriend van die Keyser; want wie maak si selv een Koning, die ben tegen die Keyser. Toen Pilatus a hoor deese Woord, soo em a breng Jesus ut, en a set neer op die Rechter-Stoel, na die Plek, die ben genaamt Steen-Vloer, en na Hebreesch: Gabbatha. Maar die a wees die Dag vor bereid die Passa omtrent die Sesde Uur.* En em a see na die Jooden: Kik, die ben jender Koning.

Maar sender a roep: Wee wee met Em: kroesig Em! Pilatus a see na sender: Misal kroesig dan jender Koning! Die Hoogpriesters a antwoord: Ons no hab een ander Koning, as die Keyser. En Pilatus a oordeel, dat sender Begeerte a sal geskied. Dan em a overlevee Em na sender vor word gekroesigt.

* Omtrent ses Uur na Vroe vroe aster die Reekning van die Romeynen.

§. 123.

Matth. 27: 31-34. Marc. 16: 20-23. Luc. 23: 26-34. Joh. 19: 16-17, 18.

En die Soldaten, aster sender a ka verspot Em, soo sender a trek Em die Purpur-Mantel af, en a doe Em si eigen Kleeren aan, en a ley Em nabuten, vor Kroesig Em. En Em a draag si Kroes, en a loop hen na die Plaats, die ben genaamt Hoofd-Streel-Plaats, en na Hebreesch: Golgatha. En toen sender a ley Em hen, soo sender a vass een Mensch, die a passeer daart, Simon van Cyrene, die a kom van die Veld, die a wees een Vader van Alexander en Ruffus; sender a lee die Kroes op em, en a dwing em, dat em a moet draag die aster Jesus.

En een groot Compagnie van Volk en Vrouwen a volg Em, die a beklag en a betraan Em. En Jesus a keer Em om na sender, en a see: O Dochters van Jerisalem; No traan over mi; maar traan over jender selv, en over jender Kinders. Want kik, die Tid sal kom, na die sender sal see: Geluksalig ben die Onvruchbaren, en die Lief sender die nooit ka baar, en die Borst sender die nooit ka gie Sug. Dan sender sal begin vor see na die Bergen: Vall op ons, en na die Heuvels:

Bedek ons ! Want as sender doe soo na die groen Hout, wat sal geskied dan na die droog ?

En twee ander ookal, die a wees Quaatdoeners, a word hen geleyd, vor leid die Dood met Em. En toen sender a kom na die Plaats, genaamt Golgatha, die ben : Hoofdskeel. Plaats, da sender a gie na Em Assien vor drink, gemingelt met Gall ; en toen Em a proef die soo Em no a will drink die. Daar sender a kroesig Em, en die twee Quaatdoeners met Em, die een na si rechter, en die ander na si slinker Sie ; Maar Jesus na die Middel. Da die Skrift a word vervoelt, die see : Em ben onder die Quaatdoeners greekend. Maar Jesus a see : *Vader, vergie sender, want sendet no treet, wat sendet doe.*

§. 124.

Matt. 27 : 35-37, 50-50; Marc. 15 : 24-26, 29-31; Luc. 23 : 34-36; Joh. 19 : 19-30.

Maar die Sodaten, toen sender a ka kroesig Jesus, a neem si Kleeren, en a maak vier Part van die, voor elkeen Soldat een Part, en soo si Rok ookal. Maar die Rok a wees ongenaayt, geweven van boven af, door en door. Dan sender a see onder malkander : No, lat ons skur die, maar lat ons gooy die Lot over

die, voor wie die sal wees. Voor dat die Skrift a sal word vervoelt, die see : Sender ka partie mi Kleeren onder sender, en ka gooy die Lot over mi Rok. Deese Dingen die Soldaten a doe. En sender a set daar, en bewach Em. En die a wees omtrent die derde Jur,* toen sender a kroesig Em.

Maar Pilatus a skriev een Opskrift, wat Skuld a word gegeven na Em, en a set die na die Kroes, boven over si Hoofd ; en die a wees geskreeven : *Jesus van Nazareth, die Koning van die Jooden.* En veel van die Jooden a lees deese Opskrift, want die Plaats, waar Jesus a word gekroesigt, a wees destby die Stadt. En die a wees geskreeven na Hebreew, Griek en Latin. Da die Hoogpriesters van die Jooden a see na Pilatus : ho skriev, Die Koning van die Jooden, maar dat Em ka see : Mi ben die Koning van die Jooden. Pilatus a antwoord : Wat mi ka skriev, die mi ka skriev. En sender, die a passeer daar, a praat Lantering tegen Em, en a skuttel sender Hoofden, en a see : Foey Joe, die Joe breek die Tempel van God, en bouw die na drie Dagen, help Joe selv ; as Joe ben die Soon van God, soo kom af van die Kroes. En die Volk a staan daar, en a kikk. Glik soo

* Omtrent negen Uur na die Voormiddag aster die Reekening van die Jooden.

ook die Hoogpriesters met die Skrifgeleerden en Ondêrlingen, met sender a bespot Em, en a see: Em ka help ander Volk, en no kan help Em selv. As Em ben Christus die Koning van Israel, die Uterkiesen van God, soo Em kom noe af van die Kroes, soo ons will gloof Em. Em ka betrouw na God, diesselde verloss Em net, as Em hab Welbehagen na Em. Want Em ka see: Mi ben die Soon van God. Soo die Moordenaars, die a wees gekroesigt met Em, a skimpeer Em ookal. En die Soldaten a bespot Em ookal, en a kom na Em, en a offeteer Em Assien, en a see: As Joe ben die Koning van die Jooden, soo help Joe selv.

En een van die Quatdoeners, die a hang daat, a laster Em ookal, en a see: As Joe ben Christus, soo help Joe selv en ons. Da die ander a antwoord, a bestraf em, en a see: En joe ookal ho hab Vrees voor God, joe, die hab doch vor leid dieselvede Dood-Straf? En ons sonder Twiefel met Recht, want ons ontvang die Straf, die ons Werken ka Verdien; maar deese Mensch no kr doe eenigste Onrecht. En em a see na Jesus: Heere, dink op mi, wantmeer Joe kom nabinne Joe Koningrik. En Jesus a see na em: *Voornaar, mi see na joe: Van Dag joe sal wees met mi nabinne die Paradijs.*

En by die Kroes van Jesus a staan si Moeder, en die Susster van si Moeder, Maria, die Wif van Cleophas, en Maria Magdalena. Toen Jesus a kikk noe si Moeder, en die Junger, die Em a hab lief, a staan dasoo, soo Em a see na si Moeder: *Vrou, kikk, die ben joe Soen.* Dan Em a see na die Junger: *Kikk, die ben joe Moeder.* En van die Uur af die Junger a neem em na si Hoes.

En toen die sesde Uur a ka kom, een Duster nis a kom over die geheele Land, tee na die negende Uur.* En die Son a verloor si Skien. En na die negende Uur Jesus a roep met een groot Stem: *Eli, Eli, lama sabachani?* Die ben: *Mi God, mi God, barmhertig Joe ka verlaat mi?* En som van sender, die a staan daat, toen sender a hoor die, a see: Kikk, Em roep voor die Elias.

Aster dan, derwil Jesus a weet, dat noe allemaal a wees vollend, voor dat die Skriff a sal kom verwoell, Em a see: *Mi hab Dorst!* En een Vat voll Assien a staan daat; en aanstonds een van sender a loop, a neem een Swam, en a voell die met Assien, en a stek die op een Rietstock, en a gie na Em vor drink. Die ander sender a see: Hou op, lat ons kikk, as Elias kom vor verloss Em?

* Van Middag tee die Uur na die Aster-Middag.

Toën Jesus nôt u ka neem die Assien, soo
Em a see : *Die ben tollenaar!*

En Jesus a roep weertan met een groot Stem
en a see : *Vader, mi bevel mi Geest na Joe
Handen!* En toet Em u ka see die, Em a
neeg si Hoofd, en a gie si Geest, op.

§. 125.

Mat. 27: 51-56. Marc. 15: 38-41. Luc. 23: 47-49.

En kik, die Vorhangsel nabinne die Tem-
pel a skur in twee Stuk, van boven tee na
onder. En die Aarde a beev, en die Klip sen-
der a split, en die Graf sender a word geo-
pend, en veel Lichamen van die Heiligen,
die a slaap, a staan op, en a loop ut van die
Grafen, asier si Opstanding, en a kom nabinne
die heilige Stadt, en a verskien na veele.

Toen noe die Hoofdman, die a staan daar,
tegen Em over, en bender, die a wees met
em, en a bewach Jesus, a kik die Aardbeev-
ing, en die Dingen die a geskied, soo sender
a verakrik goe, en die Hoofdman a verheerlik
God, en a see : Voorwaar, heese a wees een
rechtveerdige Mensch, en a wees die Soort
van God. En allemaal Volk, die a wees daar,
en a kik die, toen sender a kik, wat a ges-
kied daar, sender a slaa na sender Borst, en
a keer om weeraan.

En allemaal si Frienden, en die Vrouwen,
die a ka volg Jesus van Galilea, en a ka dien
Em, a staan van veraf : Onder sender a wees
Maria Magdelena, en Maria, die Moeder van
Jacobus en Joses, (die a staan by die Kroes
ogkal) en Salome die Moeder van die Kin-
der van Zebedeus : En ook veel ander Vrou-
wen a wees daar, die a ka kom met Em na-
bovo na Jerusalem, die a kik all deese Dingen.

§. 126.

Joh. 19: 31-37.

Lammes!

Die Jooden dan, derwil die a wees die
Voorbereiding-Dag, en dat die Lichamen
no a sal blier na die Kroes na die Sabbath,
want dieselvde Sabbath-Dag a wees groot,
a bed Pilatus, dat sender Beenen a sal word
gebroken, en dat die Lichamen a kan word
afgenomen. Dan die Soldaten a kom, en a
breek die Beenen van die eerste, en van die
ander die a wees gekroesigt met Em. Maar
toen sender a kom na Jesus, en a kik, dat Em
a wees dood already, soo sender no a breek si
Beenen ; maar een van die Soldaten a open
si Sie met een Lants, en anstonds *Bloed en
Water a kom ut.*

En em, die a kik die, ka getug van die, en

si Getuignis ben waarachtig, en dieselwde weet dat em spreek die Waarheid, voor dat jender sal gloof ookal. Want deese Dingen ka geskied, dat die Skrif a sal word vervoelt: Jender no sal breek Em een Been. En weeraan een ander Skrif see: Sender sal kik, in wplk sender ka steek.

§ 127.

Matt. 27: 57-61. Marc. 15: 42-47. Luc. 23: 50-56. Joh. 19: 38-42.

Maar na die Avend een rik Man van Arimathia, een Stadt van die Jooden, met Naam Joseph, a kom, ~~die~~ wees een eerlik Raads-Heer, en em a wees een goeje rechtveerdige Man. Deese no a ka gie si Will na sander Raad en Handel, derwil em selv a verwacht na die Koningrik van God, en die a wees een Junger van Jesus, doch heymelik, ut Vrees voor die Jooden. Deese Man a neem Curagie, en a loop na Pilatus nabinne, en a bed voor die Licham van Jesus, dat em a dertv neem die af. En Pilatus a verwonder em, dat Em a wees dood already, en a roep die Hoofdman, en a vraag dieselwde, as die ben lang, dat Em ka dood. En toen em a krieg die vor weet van die Hoofdman, em a gie Permissie na em, en a gie Order, vor le-

veer die Licham na Joseph. En em a koop een Linnen, en a neem die af.

En Nicodemus a kom ookal, die toevoorn eenmaal a kom na Jesus by die Nacht, en a breng Myrthen en Aloes gemingelt onder malkander, omtrent hondert Pond. Soo sander a neem die Licham van Jesus, en a bind die nabinne die Linnen Doeken, met Specerien, glik as die Jooden sender Manier a wees vor begrav.

En Joseph a hab na die Plaats waar Jesus a wees gekroesigt, een Hofje, en nabinne die Hofje een nieuw Graf, die em a ka lat kap ut nabinne een Klip, na die niemand oit a ka lee nochal. Na daar sender a lee Jesus, om die will van die Voorbereiding-Dag van die Jooden, en die Sabbath a begin vor kom: want die Graf a wees destby; en sender a toll een groot Steen navoor die Door van die Graf, en a loop wee.

En die Vrouwen, die a ka kom met Em ut Galilea, a volg aster ookal, en a bekik die Graf: onder sender a wees Maria Magdalena, en die ander Maria, die Moeder van Joses, die a set tegen over die Graf, en a kik, hoestoo si Licham a word geleg. En sender a keer om weeraan, en a bereid Specerie en Salven;

en over die Sabbath sender a wees still, voo
as die wees geordineert na die Wet.

§ 128.

Matt. 27: 62-66.

Die ander Dag, die volg aster die Voogd,
reiding-Dag, die Hoogpriesters en Phariseen
a kom met malkander na Pilatus, en a see:
Heere, ons ka dinkop, dat deese Verleyder a
see, toen Em a leev nochal: Aster drie Da-
gen mi will staan op weeraan. Voordarom
gie Order, dat die Graf word versekert met
een Wach, tee na die derde Dag, dat niet si
Jungters kom en steel Em wee, en see na die
Volk: Em ka staan op van die Doojen; en
dan die laatste Bedrug sal kom meer slim as
die eerste. Pilatus a see na sender: Da jen-
der hab die Wach, loop hen, en bewaar die,
soo sekur as jender weet. Sender a loop hen,
en a bewaar die Graf met die Wach, en a ver-
seegel die Steen.

§ 129.

*Die Geschiednis van die Heere si Opstanding
tee na si Hemelvaart.*

Matt. 28: 1-8. Marc. 16: 1-8. Luc. 24: 1-9. Joh. 20: 1-10.

Toen noe die Sabbath a wees gepasseert,

soo Maria Magdalena, en Maria, die moeder
van Jacobus en Salome a koop Specerien,
voor dat sender a kan kom en salv Em. En
na di eerste Dag van die Week goe vroe, toen
die a wees duster nochal, en bevoor die Son
a begin vor kom op, sender a kom na die Graf,
en som ander a wees met sender, vor bekik
die, en a draag die Specerie, die sender a ka
bereid.

En kik, een groot Aardbeewing a geskied.
Want die Engel van die Heere a kom neer
van die Hemel, a staan daar, en a roll die Steen
wee van die Graf si Door, en a set nabov die.
En si Aansien a wees glik as die Blixem, En
si Kleed so wett, as die Sneuw. En die
Wachters a verskrik voor Vrees, en a kom
glik as sender a wees dood, (en a vlucht.)
Maar die Vrouwen a see onder malkander:
Wie sal roll ons die Steen wee van die Graf
si Door? want die a wees goe groot. En sen-
der a kik hen, en a bemerk, dat die Steen a
wees afgerollt.

Dan Maria Magdalena a loop voort, en a
kom na Simon Petrus, en na die ander Jun-
ger, die Jesus a hab lief, en a see na sender:
Sender ka neem die Heere wee ut die Graf,
en ons no weet na waar sender ka lee Em.
Maar die ander Vrouwen a loop nabinne die

Graf, en no a vind die Lichaam van die Heere Jesus. En die a geskied, toen sender a wees verlegen over die, sender a kik, een Jongeling set na die rechter Sie, gekleedt met een lang wett Kleed. Die stap met noch een Man in blinkende Kleeren by sender; en sender a verskrik, en a buig sender Aangesicht nee na die Aarde. Maar die Engel a see na die Vrouwen: No vrees, mi weet wel, dat jender soek Jesus die gekroesigte: Voor wat jender soek die Leevendige by die Doojen? Em no ben hier; Em ka staan op, soo as Em ka see: Kom hiesoo, en kik die Plaats, waar die Heere ka lee. En loop haastelik hen, en see die na si Jungers, en (apart) na Petrus, dat Em ka staan op van die Doojen: en kik, Em sal loop bevoor jender na Galilea, daar jender sal kik Em; Kik, mi ka see die na jender. Dink op die, hoesso Em ka see na jender, die Tid Em a wees na Galilea, nochal, en a spreek: Die Mensch si Soon moet word overgeleveert na die Handen van die sondige Menschen, en word gekroesigt, en na die derde Dag Em sal staan op weeraan. Dan sender a dink op si Worden. En sender a loop met Haast ut, en a vlucht wee van die Graf, met Vrees en groot Blyskap; want Beev en. Skrik a kom over sender: en sender a see niet een Woord (na die Pad) na eenigste Mensch; want ser-

der a wees na Vrees, en a loop vor maak die bekent na si Jungers.

Petrus dan en die ander Junger, (aster die, wat Maria Magdalena a ka see na sender) a loop nabutten, en a kom na die Graf. En dese twee a loop met malkander, en die ander Junger a loop voort, meer gauw as Petrus, en a kom vooreerst na die Graf; en a kik nabinne, en a kik die Linnen lee daar, doch em no a loop nabinne. Dan Simon Petrus a kom aster em, en a loop nabinne die Graf, en a kik die Linnen a lee daar, en die Sweel-Doek, die a wees gebonden om Jesus si Hoofd, no a lee by die Linnen, maar na Sie, over malkander gedobbelt, na een aparte Plek. Dan die ander Junger, die a kom eerst na die Graf, a loop nabinne ookal, en a kik, en a gloof die (dat die Lichaam van die Heere no a wees daar meer.) Want sender no a weet die Skrift nochal, dat Em a moet staan ^{op van die} Doojen. Dan die Jungers a loop weeraan na Hoes, en a verwonder, sender, hoesso die a geskied.

§ 130.

Marc, 16: 9. Joh. 20: 11-17.

Jesus noe, toen Em a ka staan op vroevoe, na die eerste Dag van die Week, Em a ver-

skien voreerst na Maria Magdelena, van die
 Em a ka gooy seven gnaaje Geesten ut.
 Want Maria a bliev staan nabuten by die
 Graf, en a traan. En toen em a traan hoe,
 soo em a kik nabinné die Graf, en a kik twee
 Engels set daar in wette Kleeren, een by die
 Hoofd, en die ander by die Voeten, waar sen-
 der a ka lee die Lichaaam van Jesus. En sen-
 der a see na em; Vrouw, voor wat joe traan?
 em a see na sender: Voordarom, dat sender
 ka neem mi Heere wee, en mi no weet, na
 waar sender ka lee Em. En toen em a see
 die, em a keer si selv asterwards, en a kik
 Jesus staan daar, en no a weet, dat die ben
 Jesus. Da Jesus a see na em: Vrouw, voor
 wat joe traan? Wie joe soek? em a dink dat
 die ben die Hofseman, en a see na Em: Heere,
 as joe ka draag Em wee, soo see na mi, na
 waar joe ka lee Em, soo mi will haal Em.
 Jesus a see na em: Maria! da em a keer em
 om, en a see na Jesus: Rabboni! die ben vol-
 see Meester. Jesus a see na em: Nò roer mi
 aant; want mi no ka vaar op nochal na mi
 Vader. Maar loop hen na mi Broeders, en
 see na sender: Mi vaar op na mi Vader, en
 na jender Vader, na mi God, en na jender God.

§ 131.

Mat. 28: 9, 10.

En toen die ander Vrouwen a wees na Pad,
 vor maak die bekend na si Jungers, Kik da
 Jesus a gemoet sender en a see: Wees ge-
 groet! En sender a kom na Em, en a vass
 si Voeten, en a vall neer navoor Em. Dan
 Jesus a see na sender: No hab Vrees: loop
 hen, en bring die Boodschap na mi Broeders,
 dat sender loop na Galilea; en daar sender
 sal kik mi.

§ 132.

Mat. 28: 11-15.

Maar toen sender a loop hen, kik, da som
 van die Wachters a kom nabinne die Stadt,
 en a vertell na die Hoogpriesters all die Din-
 gen, die a ka geskied. En sender a kom mal-
 kander met die Onderlingen, en a hou een
 Raad, en a gie na die Soldaten Geld genoeg,
 en a see: Jender see soo: Si Jungers a kom
 na die Nacht, en a steel Em wee, derwil ons
 a slapp. En as die sal kom ook tee na die
 Ooren van die Gouverneur, soo ons will stell
 em toevreeden, en maak, dat jender kan wees

sonder Sorg. En sender a neem die Geld, en a doe, glik as sender wees geleert. En deese Woord a kom een algemeen Praat by die Jooden, tee na deese Dag.

§ 133.

Marc. 16: 10, 11. Luc. 24: 9-11. Joh. 20: 18.

En Maria Magdalena a kom na die Jungers, die a wees bedroefd, en a tran, en a vertell na sender: Mi ka kik die Heere, en deese Woorden Em ka see na mi. En dieselvde, toen sender a hoor, dat Em leev, en dat Em a verskien na em, sender no a gloof die. En die a wees Maria Magdalena, en Johanna, en Maria, Jacobus si Moeder, en die ander Vrouwen met sender, die a see die na die Apostels, en na allemaal die ander: maar sender Woorden a kom sender ook niet anders voor, as ydel Praat, en sender no a gloof die. Asteraan na dieselvde Dag die Simon Petrus a kik Em ookal. 1 Cor. 15: 4.

§ 134.

Marc. 16: 12, 13. Luc. 24: 12-36, 1

Asteraan Em a openbaar si self, na twee

van sender, in een ander Form. Want kik, twee van sender a loop na dieselvde Dag na een Dorp, die a wees sesig Veldwegs van Jerusalem af, genaamt Emmaus. En sender a spreek met malkander van all deese Geskiedenis. En die a geskied, toen sender a spreek soq, en a vraag malkander, dat Jesus a naader na sender, en a wandel met sender. Maar sender Oogen a word gehouden, dat sender no a ken Em. En Em a see na sender: Wat voor Woorden die ben, die jender verhandel onder malkander na Pad, en ben soo bedroefd?

Da een van sender, met Naam Cleophas, a antwoord en a see na Em: Joe ben dan alleen een Vremdeling in Jerusalem, die no weet, wat ka geskied dasoo na deese Dagen? En Em a see na sender: Wat dan? En sender a see na Em: dat van Jesus van Nazareth, die a wees een Propheet, machtig in Werken en Woorden navoor God en allemaal Volk: hoosoo ons: Hoogprieesters en Oversten ka overleever Em na die Oordeel van die Dood, en ka kroesig Em. Maar ons a hoop, dat Em a sal verloss Israel: en benevens all dat ben noevan Dag die derde Dag, van sens die ka geskied. En ookal som Vrouwen van ons Companie ka verskrik ons; sender a wees vroe vroe na die Graf, en no ka vind si Licham, dan sender, a kom, en a see, dat sender a k k

een Verskiening van Engels, die see dat Em leev. En som van ons a loop hen na die Graf, en a vind die soo, glik as die Vrouwen a ka see: maar Em sender no a vind.

En Em a see na sender: O jender Ontvandingen en traag van Hert, vor gloof allemaal, wat die Propheeten ka spreek: Christus no a moet dan leid all dese Dingen, en dan loop nabinne si Heerlikheid? En Em a begin van Moses, en van allemaal Propheeten, en a verklaar na sender all die Skriften, die a wees gesproken van Em. En sender a kom desby die Dorp, na die sender a loop: en Em a doe soo, glik as Em a will loop verder. En sender a dwing Em, en a see: Blev by ons, want die Avend will kom, en die Dag ka passeer. En Em a loop nabinne, vor bliev by sender. En die a geskied, toen Em a set met sender na Tafel, Em a neem die Brood, a dank, a breek die, en a gie die na sender. Da sender Oogen a word geopend, en sender a ken Em; en Em a kom wee ut van sender Gesicht. En sender a see onder malkander: Ons Hert nabinne ons a wees dan niet na Vlam, toen Em a spreek met ons na Pad, en toen Em a open die Skrif voor ons? En sender a staan op na dieselvde Ur, en a keer om weeraan na Jerusalem, en a vind die Elf vergadert malkander, en die a wees met sender, die a see: Die

Heere ka staan op waarachtig, en ka verskien na Simon. En die twee a vertell na sender, wat a ka geskied na Pad, en hoeso Em a kom bekend na sender, na die, toen Em a breek die Brood. En sender ookal no a gloof die.

§ 135.

Marc, 16: 14. Luc, 24: 36-48. Joh, 20: 19-26.

Maar na die Avend van dieselvde eerste Dag van die Week, toen die Jungers a wees vergadert, en die Dooren a wees geslooten, voor Vrees van die Jooden, en toen sender a spreek met die twee Jungers van die nochal, da Em selv, Jesus, a kom, en a openbaar si selv na die Elf, toen sender a set na Tafel, en a staan na Middel van sender, en a see na sender: Vrede wees met jender! Maar sender verskrik, en a kom na Vrees, en a dink, dat sender a kik een Geest. En Em a see na sender: Voorwarom jender ka weeslik soo? en voorwarom soo Gedachten kom op nabinne jender Hert? Kik mi Handen en mi Voeten; Mi selv ben die, voel mi, en kik, want een Geest no hab Vleesch en Gebeente, glik as jender kik, dat mi hab.

En toen Em a see die, soo Em a wies na sender si Handen en si Voeten. Da die Jun-

gers a kom bli, dat sender a kik die Heere. Maar derwil sender no a gloof nochal, vor Biskap, en a verwonder sender, soo Em a see na sender: Jender hab dan eenigste Jeethier! En sender a gie na Em een Stuk yan Bran-Visch, en Honingraten; en Em a neem die, en a jeet die navoor sender Oogen. En Jesus a bestraf sender Ongloof en die Hardheid van sender Het, dat sender no a-ka gloof diejeen, die a ka kik Em aster si Opstanding.

En Em a see na sender: Deese ben die woorden, die mi a see na jender, toen mi a wees met jender nochal. Want allemaal moet word verwoell, wat ben geskreven van mi in die Wet van Moses, en in die Propheeten, en in die Psalmen. Dan Em a open sender Vers-tand, dat sender a verstaan die Skriften, en a see na sender: Soó die ben geskreven, en a soo Christus a moet leid, en stán op van die Doojen na die derde Dag; en lat predik in si Naam Bekeering en Vergaving van Sonden onder allemaal Volk, en begin van Jerusalem; thar jender ben Getugens van all deese Din-gen.

En (by die Afskeld) Jesus a see weeraan na sender: Vrede wees met jender! Glik as die Vader ka stier mi, soo mi stier jender. En toen Em a see die, soo Em a assem sender aan, en a see na sender: Ontvang die heilig

Geest; na welk jender vergie die Sonden, na sender die ben vergeven; en na welk jender behou die Sonden, na sender die ben behouden.

Maar Thomas een van die Twalf, die ben genaamt Twilling, no a wees met sender, toen Jesus a kom. Da die ander Jungers a see na em: Ons ka kik die Heere. Maar em a see na sender: Sonder dat mi kik die Merk van die Spiker nabinne si Handen, en lee mi Vinger nabinne die Merk van die Spiker, en lee mi Hand nabinne si Sie, mi no will gloof die.

§ 136.

Jon, 20: 26-29.

En aster acht Dagen si Jungers a wees weeraan nabinne, en Thomas met sender: Da Jesus a kom toen die Dooren a wees gesloten, en a staan na middel van sender, en a see: Vrede wees met jender! Dan Em a see na Thomas: Raak joe Vinger hier, en kik mi Handen; en raak joe Hand hier, en lee die nabinne mi Sie, en wees niet onglooffg, maar glooffg. Thomas a antwoord en a see na Em: Mi Heere en mi God. Jesus a see na Em: Derwil joe ka kik mi, Thomas, soo joe gloof: salig sender ben, die no kik, en gloof doch!

Aster deese Dingen Jesus a openbaar Em selv weeraan na si Jungers, na die See van Tiberias. En Em a openbaar Em selv soo: Daar a wees by malkander Simon Petrus, en Thomas, genaamt Twilling, en Nathanael van Cana in Galilea, en die Soons van Zebedeus, en noch twee ander van si Jungers: Simon Petrus a see na sender: Mi will loop hen vor visch. Sender a see na em: Soo ons will loop met joe. Sender a loop nabuten, en a stap aanstonds nabinne die Skip; en na dieselvde Nacht sender a vang nietmetal. Maar na vroevee Jesus a staan na die Seekant, en die Jungers no a weet die, dat die a wees Jesus. Dan Jesus a see na sender: Kinders, jender hab dan nietmetal vor jeet? Sender a antwoord Em: Neen, En Em a see na sender: Gooy die Net na die rechter Sij van die Skip, soo jender sal vind. Da sender a gooy die ut, en sender no a kan vor haal die ut voor die Meenigte van die Vischen.

Da die Junger, die Jesus a hab lief, a see na Petrus: Die ben die Heere. Toen Simon Petrus a hoor, dat die a wees die Heere, da em a gord si Vischer-Rok rond si Lif, want em a wees naked, en a gooy si selv nabinne die See. Maar die ander Jungers a kom met

die Skip; (want sender no a wees verwee van die Land, maar omtrent twee hondert Ellen,) en a slep die Net met die Vischen. Toen sender a kom noe ut na die Land, soo sender a kikk daar een Kool-Vuur, en Visch a lee op die, en Brood. Jesus a see na sender: Breng hier van die Vischen, die jender ka vang noe. Simon Petrus a stap nabinne, en a haal die Net na Land, voll met groot Vischen, hondert en drie en vyftig: en maski die a hab soo moeschi, doch die Net no a breek. En Jesus a see na sender: Kom, en hou die Middagmaalid. Maar niet een van die Jungers a derv vraag Em: Wie Joe ben? Want sender a weet die, dat die a wees die Heere. Dan Jesus a kom, en a neem die Brood, en a gie die na sender, en glik soo die Vischen bokal. Die ben noe die derdemaal, dat Jesus a openbaar Em selv (na som van sender of na allemaal) si Jungers, aster Em a ka staan op van die Doojen.

Toen sender a ka hou noe die Middagmaalid, soo Jesus a see na Simon Petrus: Simon, Soon van Jonas, joe hab mi dan meer lief, as deese hab mi? Simon a see na Em: Ja Heere, Joe weet, dat mi hab Joe lief. Jesus a see na Em: Weid mi Lam sender. Jesus a see die tweedemaal na em: Simon, Soon van Jonas, joe hab mi lief? Simon a see na Em: Ja,

Heere, Joe weet, dat mi hab Joe lief. Jesus a see na em: Weid mi Skaapen. Jesus a see die derdemaal na em: Simon, Soon van Jonas, joe hab mi lief! en em a see na Jesus: Heere, Joe weet alle Dingen, Joe weet, dat mi hab Joe lief. Jesus a see na em: Weid mi Skaapen. Voorwaar, voorwaar, mi see na joe: Toen joe a wees meer jong, da joe a gord joe selv, en a wandel, na waar joe a will, maar wänneer joe sal kom oud, dan joe sal strek joe Handen ut, en een ander sal gord joe, en breng joe na waar joe no will. Deese Woorden Jesus a see, vor beteeken, met welk Dood Petrus a sal veeheerlik God. En toen Em a ka see die, En a see na Petrus: Volg mi.

Petrus dan a keer em om, en a kik die Junger volg ookal, die Jesus a hab lief, die ka lee ook na si Borst by die Avendmaaltid, en die a ka see, Heere wie die ben, die sal verraad Joe? Toen Petrus a kik deese, soo em a see na Jesus: Heere, maar wat deese sal dan? Jesus a see na em: As mi will, dat em blier, tee mi kom, wat die raak na joe? joe volg mi. Dan een Woord a kom ut onder die Broeders, dat deese Junger no a sal dood. En Jesus no a see na em, dat em no a sal dood, maar, as mi will, dat em blier tee mi kom, wat die raak na joe?

Mat. 23: 16-20. Mar. 16: 15-18.

Ende die elf Jungers a loop na Galilea, nabovo een Berg, na waar Jesus a ka bestellender. (En daar a wees vergadert malkander meer as vyf hondert Broeders. 1 Cor. 15: 6.) En toen sender a kik Em, sender a vall neer, voor Em, maar som a twiefel. En Jesus a kom na sender a spreek met sender en a see: Na mi ben gegeven allemaal Macht na die Hemel en op die Aarde. Voorधारom loop hen na die geheele Werld, en predik die Evangelium na allemaal Creaturen, en leer allemaal Volk, en doop sender in die Naam van die Vader, en van die Soon, en van die heilig Geest. En leer sender vor hon all, wat mi ka gebied na jender. Wie gloof en word gedoopt, die sal word salig; maar wie no gloof, die sal word verdoemt. En die Teekens, die sal volg sender, die gloof, ben die: In mi Naam sender sal gooy quaje Geesten ut; sender sal spreek met nieuwe Tongen, sender sal neem Slangen op; en as sender drink ook eenigste Ding, soo die no sal skad sender. Op sick Volk sender sal lee die Handen, soo die sal kom beeter met sender. En kik, mi ben met jender alle Dagen, tee na die End van die Werld.

Ende die elf Junger.

Asteraan die Apostel Jacobus a kik Em.
(1 Cor. 16: 7.)

§ 139.

Apost. Handl. 1: 3-12. Marc. 16: 19, 20. Luc. 24: 49-53.

Toen noe Jesus a lat kik Em selv van die Apostles, veertig Dagen, en a spreek met sender van die Koningrik van God: on toen Em a hab sender (die laatstemaal) by malkander, soo Em a gie Order na sender, dat sender no a sal loop wee van Jerusalem, maar sal verwacht die Beloofdenis van die Vader, die jender, Em a see; mi will stier op jender die Beloofdenis van mi Vader. Maar jender sal blyv nabinne die Stadt Jerusalem; tee-jenddy word aangedaan met Kracht ut van die Hoochte. Want Johannes ka doop wel mei Water, maar jender sal word gedoopt met die heilig Geest, niet lang aster deese Dagen. Sender noe, die a kom by malkander, a vraag Em, en a see: Heere, Joe sal recht op dan na deese Tid weernan die Koningrik van Israel? Maar Em a see na sender: Die no pass voor jender, vor weet die Tid of die Uur, die die Vader ka stell na si eigen Macht; maar jender sal ontvang die Kracht van die heilig Geest, die sal kom over jender, en jender sal wees mi Ge-

tugens na Jerusalem, en na die geheele Judea, en na Samaria, en tee na die End van die Arde.

En toen Em a ka see die, Em a ley sender nabuten, tee na Bethanien, en a lechtop si Manden, en a segen sender. En die a geskied, toen Em a segen sender, da Em a word opgenomen soo dat sender a kik die, en een Volk a neem Em op, en wee, navoor sender Oogen, na die Hemel, en Em a set Em na die rechter Hand van God.

En toen sender a kik aster Em, soo as Em a vaar op na die Hemel, kik, da twee Mans a staan daar by sender in wette Kleeren; die a see ookal: Jender Mans van Galilea voor wat jender staan, en kik na die Hemel toe! Dees twee mans sal kom, glik as jender ka kik na die Hemel, sal kom, glik as jender ka kik Em a vaar op na die Hemel.

Maar sender a bed Em aan, en a keer om weeraan na Jerusalem, met groot Biskap, van die Berg, die ben genant die Oliebberg, die ben destby Jerusalem, en lee een Sabbath-Reis van daar: en sender a wees alid nabinne die Tempel, a pries en a loof God. En (aster die Ustorting van die heilig Geest) sender a loop ut, en a predik na allemaal Plaatsen; en die Heere a werk met sender, en a bevestig die Woord door Teekens, die a volg daarop.

Joh. 30: 30, 31: 21: 25.

En die hab ook veel ander Ding, en
Teekens, die Jesus ka doe in Presentie van
si Jungers, die no ben gestreeven in deese
Boek: dat die, as sender sal word opgeskree-
ven, een aster die ander, soo mi (Johannes)
dink, dat die World no sal vass die Boeken,
die a sal wees vor skriev. Maar deese ben
gestreeven, dat jender sal gloof, dat Jesus
ben Christus die Soon van God; en dat door
die Gloof jender hab die ewig Leov, in si
Naam. Amen.

Amminicus